

晉

書

料

注

晉書斟注卷七十八

錢塘吳士鑑

同注

烏程劉承幹

列傳第四十八

孔愉

子汪 安國 弟祗 從子坦 嚴  
從弟羣 羣子沈

孔愉字敬康會稽山陰人也其先世居梁國會祖潛太

子少傳漢末避地會稽因家焉祖竺吳豫章太守元和  
姓纂

六日竺吳南昌太守案吳時有豫  
章郡無南昌郡作南昌者誤也父恬湘東太守從兄

侃大司農俱有名江左愉年十三而孤養祖母以孝聞

與同郡張茂字偉康丁潭字世康齊名潭本傳同御覽  
三百六十三引

晉中興書誤作  
丁潭字子康

時人號曰會稽三康吳平愉遷于洛惠

帝末歸鄉里行至江淮間遇石冰封雲爲亂雲逼愉爲

參軍不從將殺之賴雲司馬張統營救獲免東還會稽

入新安山中改姓孫氏以稼穡讀書爲務信著鄉里後

忽捨去皆謂爲神人而爲之立祠

寰宇記一百四日孔靈村在歙縣南二十

五里孔愉避地入新安山谷中後忽捨去皆以爲神人

爲之立廟按所居止在此故謂之孔靈山祀其上書鈔

六十九晉中興書會稽孔錄曰避地餘杭布衣蔬食不

求聞達世說棲逸篇注孔愉別傳曰永嘉大亂愉入臨

海山中不求聞達案本傳言新安山中而何書及別傳

世說

新安歟永嘉中元帝始以安東將軍鎮揚土命愉爲參

軍邦族尋求莫知所在建興初始出應召爲丞相掾

棲逸篇曰孔車騎少有嘉遁  
意年四十餘始應安東命  
仍除駙馬都尉參丞相軍

事時年已五十矣以討華軼功封餘不亭侯愉嘗行經

餘不亭見籠龜於路者愉買而放之溪中龜中流左顧

者數四初學記三十臧榮緒晉書曰少時嘗得一龜放

不溪在武康縣東二十四里其水清與餘杭溪不類也

孔愉曾買得一龜放餘不溪中又曰孔愉潭在德清縣

南二百步昔愉隱吳憾山見漁人及是鑄侯印而印龜

釣得白龜買而放之卽此處也

左顧三鑄如初印工以告愉乃悟遂佩焉類聚九十六

日及封此亭侯而鑄印龜首迴屈三鑄不正有似昔龜

之顧靈德感應如是初學記三十引臧榮緒晉書又二

十六引晉中興書三鑄均作更鑄亦然書帝爲晉王使

鈔一百三十一引晉中興書作更鑄猶然

長兼中書郎宋書禮志一中書侍郎孔愉奏若日有變

便伐鼓於諸門有違舊典詔曰所陳有正

義輒敕外改之案  
本傳郎上脫侍字

于時刁協劉隗用事王導頗見疎遠

愉陳導忠賢有佐命之勳謂事無大小皆宜諮訪由是  
不合旨出爲司徒左長史累遷吳興太守沈充反愉棄  
官還京師拜御史中丞遷侍中太常及蘇峻反愉朝服  
守宗廟初愉爲司徒長史以平南將軍溫嶠母亾遭亂  
不葬乃不過其品至是峻平而嶠有重功愉往石頭詣  
嶠嶠執愉手而流涕曰天下喪亂忠孝道廢能持古人  
之節歲寒不凋者唯君一人耳時人咸稱嶠居公而重  
愉之守正尋徙大尙書遷安南將軍江州刺史不行轉  
尙書右僕射領東海王師尋遷左僕射咸和八年詔曰

尙書令玩左僕射愉竝恪居官次祿不代耕端右任重

先朝所崇其給玩親信三十人愉以

元無以字

二十人稟賜

愉上疏固讓優詔不許重表曰臣以朽闇忝廁朝右而以情劣無益毗佐方今疆寇未殄疆場日駭政煩役重百姓困苦姦吏擅威暴人肆虐大弊之後倉庫空虛功勞之士賞報不足困悴之餘未見拯卹呼嗟之怨人鬼感動宜并官省職貶食節用勤撫其人以濟其艱臣等不能贊揚大化糾明刑政而愉安高位橫受寵給無德而祿殃必及之不敢橫受殊施以重罪戾從之王導聞而非之於都坐謂愉曰君言姦吏擅威暴人肆虐爲患

是誰愉欲大論朝廷得失陸玩抑之乃止後導將以趙

盾爲護軍

案書鈔六十四引晉中興書趙盾作趙泳蓋宋本避太祖諱也御覽二百四十引作趙泳

又因泳而誤

愉謂導曰中興以來處此官者周伯仁應思遠

耳今誠乏才豈宜以趙盾居之邪導不從其守正如此由是爲導所銜後省左右僕射以愉爲尙書僕射愉年在懸車累乞骸骨不許轉護軍將軍加散騎常侍復徙領軍將軍加金紫光祿大夫領國子祭酒頃之出爲鎮軍將軍會稽內史加散騎常侍句章縣有漢時舊陂毀廢數百年愉自巡行修復故堰溉田二百餘頃皆成良業在郡三年乃營山陰湖南侯山下數畝地爲宅艸屋

數間

寰宇記九十六曰侯山在會稽縣西南四里

便棄官居之送資數百萬

悉無所取病篤遺令斂以時服鄉邑義昭一不得受年

七十五咸康八年卒

輿地紀勝十曰孔愉墓在山陰

贈車騎將軍開府

儀同三司諡曰貞三子閭汪安國

世說德行篇往續晉陽秋曰孔安國車騎

愉第六子也案本傳言愉三子蓋但舉其最著者

閭嗣爵位至建安太守閭子

靜字季恭再為會稽內史累遷尚書左僕射加後將軍

宋書孔靖傳父閭散騎常侍靖名與高祖祖同諱故稱

字始察孝廉累遷司徒左西掾為會稽內史遷吳興太

守尚書右僕射再為會稽內史復為右僕射除領軍加

散騎常侍太尉軍諮祭酒宋臺建為尚書令侍中靖子

生道穰靈符生會稽太守靈符撫軍長史靈符子湛之

淵之淵之尚書比部郎南史孔靖傳曰靈符弟靈運著

作郎靈運子琇之江夏內史琇之子琰尚書三公郎琰

子幼孫虔孫幼孫無錫令幼孫子奐字休文弘範宮衛



尉侯子紹安紹新紹忠紹忠字孝揚鄱陽東曹掾案靜當從宋書南史作靖元和姓纂亦作靖

汪字德澤好學有志行孝武帝時位至侍中時茹千秋以佞媚見幸於會稽王道子汪屢言之于帝帝不納遷尙書太常卿以不合意求出爲假節都督交廣二州諸軍事征虜將軍平越中郎將廣州刺史甚有政績爲嶺表所稱太元十七年卒

安國字安國年小諸兄三十餘歲羣從諸兄並乏才名

以富彊自立唯安國與汪少厲孤貧之操

世說德行篇注續晉陽秋

日少而孤貧能善樹節

汪旣以直亮稱安國亦以儒素顯孝武帝

時甚蒙禮遇

世說德行篇作豫蒙眷接

仕厯侍中太常及帝崩安國

形素羸瘦服衰經涕泗竟日見者以爲眞孝

世說德行篇曰著重

服竟日涕泗流漣見者以爲眞孝子

再爲會稽內史領軍將軍安帝隆安

中下詔曰領軍將軍孔安國貞慎清正出內播譽可以

本官領東海王師必能導達津梁依仁游藝後厯尙書

左右僕射

宋書禮志三義熙二年六月白衣領尙書左僕射孔安國殷祠啓

義熙四年

卒贈左光祿大夫

祗字承祖太守周札命爲功曹史札爲沈充所害故人

賓吏莫敢近者祗冒刃號哭親行殯禮送喪還義興時

人義之

坦字君平祖沖丹楊太守父侃大司農坦少方直有雅

望通左氏傳解屬文

世說言語篇注王隱晉書曰善春秋有文辨

元帝爲晉

王以坦爲世子文學東宮建補太子舍人

書鈔六十六晉中興書會

稽孔錄曰以才名獨步補東宮舍人

遷尙書郎時臺郎初到普加策試帝

手策問曰吳興徐馥爲賊殺郡將郡今應舉孝廉不坦

對曰四罪不相及殛鯀而興禹徐馥爲逆何妨一郡之

賢又問姦臣賊子弑君污宮瀦宅莫大之惡也鄉舊廢

四科之選今何所依坦曰季平子逐魯昭公豈可以廢

仲尼也竟不能屈先是以兵亂之後務存慰悅遠方秀

孝到不策試普皆除署至是帝申明舊制皆令試經有

不中科刺史太守免官太興三年秀孝多不敢行其有

到者竝託疾帝欲除署孝廉而秀才如前制坦奏議曰  
臣聞經邦建國教學爲先移風崇化莫尙斯矣古者且  
耕且學三年而通一經以平康之世猶假漸漬積以日  
月自喪亂以來十有餘年干戈載揚俎豆禮戢家廢講  
誦國闕庠序率爾責試竊以爲疑然宣下以來涉厯三  
載累遇慶會遂未一試揚州諸郡接近京都懼累及君  
父多不敢行其遠州邊郡掩誣朝廷冀於不試冒昧來  
赴旣到審試遂不敢會臣愚以不會與不行其爲闕也  
同若當偏加除署是爲肅法奉憲者失分僥倖投射者  
得官積風傷教懼於是始夫王言如絲其出如綸臨事

改制示短天下人聽有感臣竊惜之愚以王命無貳憲制宜信去年察舉一皆策試如不能試可不拘到遣歸不署又秀才雖以事策亦汜問經義苟所未學實難闡通不足復曲碎垂例違舊造異謂宜因其不會徐更革制可申明前下崇修學校普延五年以展講習鈞法齊訓示人軌則夫信之與法爲政之綱施之家室猶弗可貳況經國之典而可翫黷乎帝納焉聽孝廉申至七年秀才如故文獻通考二十八曰孝廉諸科自東漢以來皆以策試之名今觀東晉之事則應舉者皆不已不足以稱其科之且以孝廉自名而必遲以五歲待其講習乃能試之人且以孝廉自名而必遲以五歲待其講習乃能豫於試不亦有視面目乎然觀惠帝永寧初王接舉秀才報友人書曰今世道交喪將遂剝亂而智識之士

鉗口韜筆非榮此行欲極陳所言冀有覺悟會是歲三  
王舉義惠帝復祚以國有大慶天下秀才孝廉一皆不  
試接以爲恨然則上下相蒙姑息具文其來久矣宜其皆欲僥倖於不試也時典客令萬默

領諸胡胡人相誣朝廷疑默有所偏助將加大辟坦獨

不署由是被譴遂棄官歸會稽久之除領軍司馬未赴

召會王敦反與右衛將軍虞潭俱在會稽起義而討沈

充事平始就職揚州刺史王導請爲別駕咸和初遷尙

書左丞深爲臺中之所敬憚書鈔六十王導答別駕孔坦拜左右丞辭曰省民慨

然然卿在朝無賴端右康濟時務拾遺損益者多矣眾

談咸以左丞事要宜須諒直以攝百揆今天子事繁亦

是急病攘夷之尋屬蘇峻反坦與司馬司徒陶回白王

導曰周家祿校勘記曰回爲司馬官名誤倒及峻未至宜急斷阜陵

之界守江西當利諸口彼少我眾一戰決矣若峻未至  
可往逼其城今不先往峻必先至先人有奪人之功時  
不可失導然之庾亮以爲峻脫逕來是襲朝廷虛也故  
計不行峻遂破姑孰取鹽米亮方悔之坦謂人曰觀峻  
之勢必破臺城自非戰士不須戎服旣而臺城陷戎服  
者多死白衣者無他時人稱其先見及峻挾天子幸石  
頭坦奔陶侃

書鈔一百三十三王隱晉書曰蘇峻亂孔坦之妻以席自鄣得免

侃引爲

長史時侃等夜築白石壘至曉而成聞峻軍嚴聲咸懼  
來攻坦曰不然若峻攻壘必須東北風急令我水軍不  
得往救今天清靜賊必不動決遣軍出江乘掠京口以

東矣果如所籌時郗鑒鎮京口侃等各以兵會既至坦  
議以爲本不應須召郗公遂使東門無限今宜遣還雖  
晚猶勝不也侃等猶疑坦固爭甚切始令鑒還據京口  
遣郭默屯大業又令驍將李閔曹統周光與默并力賊  
遂勢分卒如坦計及峻平以坦爲吳郡太守自陳吳多  
賢豪而坦年少未宜臨之王導庾亮竝欲用坦爲丹楊  
尹書鈔七十六語林曰蘇峻新平溫庾諸公以朝廷初  
復京尹宜得望實唯孔君平可以處之也晉書校文  
四曰據世說注現勸則此事傳疑不足信晉書采之蓋  
攷之未審案本傳下文云拂衣而去導等亦止是坦未  
拜命不得云時亂離之後百姓凋弊坦固辭之導等猶  
晉書誤采也  
未之許坦慨然曰昔肅祖臨崩諸君親據御牀共奉遺



詔孔坦疎賤不在顧命之限

世說方正篇作諸君親升御牀並蒙眷識共奉遺詔

御覽二百五十二引語林作卿輩身侍御牀既有艱難

口行詔令孔坦爾時正藥臣耳何與國家事案世說方正

則以微臣爲先今由俎上肉任人膾截耳篇作今猶俎

上腐肉是本傳由當作猶御覽二百五十乃拂衣而去

二引語林作吾俎上腐肉任人割截耳乃拂衣而去

導等亦止於是遷吳興內史世說方正篇注王隱晉書

上用爲豫章太守坦辭母老不行臺以爲吳郡吳郡多

名族而坦年少乃授吳興內史周家祿校勘記曰內史

當作太守封晉陵男加建威將軍以歲饑運家米以振

張茂傳同窮乏百姓賴之時使坦募江淮流人爲軍有殿中兵因

亂東還來應坦募坦不知而納之或諷朝廷以坦藏臺

叛兵遂坐免尋拜侍中咸康元年石聰寇厯陽王導爲

大司馬討之請坦爲司馬會石勒新死季龍專恣石聰  
及譙郡太守彭彪等各遣使請降坦與聰書曰華狄道  
乖南北迴邈瞻河企宋每懷饑渴數會陽九天禍晉國  
姦凶猾夏乘釁肆虐我德雖衰天命未改乾符啟再集  
之慶中興應靈期之會百六之艱旣過惟新之美日隆  
而神州振蕩遺氓波散誓命戎狄之手跼蹐豺狼之穴  
朝廷每監寐永歎痛心疾首天罰旣集罪人斯隕王旅  
未加自相魚肉豈非人怨神怒天降其災蘭艾同焚賢  
愚所歎哀矜勿喜我后之仁大赦曠廓唯季龍是討彭  
譙使至粗具動靜知將軍忿疾醜類翻然同舉承問欣

豫慶若在已何知幾之先覺矢石之易悟哉

案易豫介于石釋文

古文作矢鄭古八反謂磨矢也字林矢堅也坦蓋引領

習鄭氏學者桓溫傳亦云矢如石焉所以成務

來儀怪無聲息將軍出自名族誕育洪胄遭世多故國  
傾家覆生離親屬假養異類雖逼僞寵將亦何賴聞之  
者猶或有悼況身嬰之能不憤慨哉非我族類其心必  
異誠反族歸正之秋圖義建功之日也若將軍喻納往  
言宣之同盟率關右之眾輔河南之卒申威趙魏爲國  
前驅雖寶融之保西河黥布之去項羽比諸古今未足  
爲喻聖上寬明宰輔弘納雖射鉤之隙賞之故行雍齒  
之恨侯之列國況二三子無曩人之嫌而遇天啟之會

當如影響有何遲疑今六軍誠嚴水陸齊舉熊羆踴躍  
齟齬爭先鋒鏑一交玉石同碎雖復後悔何嗟及矣僕  
以不才世荷國寵雖實不敏誠爲行李之主區區之情  
還信所具夫機事不先鮮不後悔自求多福唯將軍圖  
之朝廷遂不果北伐人皆懷恨坦在職數年遷侍中時  
成帝每幸丞相王導府拜導妻曹氏有同家人坦每切  
諫世說賞譽篇下注語林曰孔坦爲侍中密啟成帝不  
宜往拜曹夫人丞相聞之曰王茂弘鴛鴦耳卜望之  
之嚴嚴刁玄亮之察察戴若思之峰距當敢爾不繼職林敦雄熾踴躍之時帝刻日納后而  
尙書左僕射王彬卒彬本傳作右僕射議者以爲欲卻期坦曰  
婚禮之重重於救日蝕救日蝕有后之喪太子墮并則

止納后盛禮豈可以臣喪而廢從之及帝既加元服猶

委政王導坦每發憤以國事爲己憂

書鈔七十四晉中興書會稽孔錄曰

事爲己任愁之如身中病者也

嘗從容言於帝曰陛下春秋以長聖敬

日躋宜博納朝臣諮諏善道由是忤導出爲廷尉

御覽二百

三十一會稽後賢記曰孔坦遷廷尉卿獄多囚繫坦到官躬執辭狀口辨曲直大小以情不加楚撻每臺司錄

獄無所顧問皆面決當時之事

怏怏不悅以疾去職加散騎常侍遷尙

書未拜疾篤庾冰省之乃流涕

御覽七百三十九引語林作庾司空爲會稽省

之問訊甚至爲之流涕

坦慨然曰大丈夫將終不問安國寧家之

術乃作兒女子相問邪冰深謝焉

御覽七百三十九引語林作庾問迴還謝

之請其語言

臨終與庾亮書曰不謂疾苦遂至頓弊自省縣

絲奄忽無日修短命也將何所悲但以身往名沒朝恩  
不報所懷未敘卽命多恨耳足下以伯舅之尊居方伯  
之重抗威顧眄名震天下棖榘之佐常願下風使九服  
式序四海一統封京觀於中原反紫極於華壤是宿昔  
之所味詠慷慨之本誠矣今中道而斃豈不惜哉若死  
而有靈潛聽風烈俄卒時年五十一追贈光祿勳謚曰  
簡亮報書曰廷尉孔君神遊體離嗚呼哀哉得八月十  
五日書知疾患轉篤遂不起濟悲恨傷楚不能自勝足  
下方在中年素少疾患雖天命有在亦禍出不圖且足  
下才經於世世常須才況於今日倍相痛惜吾以寡乏

忝當大任國恥未雪夙夜憂憤常欲足下同在外藩勩力時事此情未果來書奄至申尋往復不覺涕隕深明足下慷慨之懷深痛足下不遂之志邈然永隔夫復何

言謹遣報荅并致薄祭望足下降神饗

元作享

之子混嗣

嚴字彭祖

世說品藻篇作嚴

祖父奕全椒令明察過人時有遺

其酒者始提入門奕遙呵之曰人餉吾兩罌酒其一何

故非也檢視之一罌果是水或問奕何以知之笑

元作奔

曰酒重水輕提酒者手有輕重之異故耳在官有惠化

及卒市人若喪慈親焉父倫黃門郎

世說品藻篇注引中興書作父儉黃

門侍郎案儉爲儉之誤

嚴少仕州郡歷司徒掾尚書殿中郎殷浩

臨揚州請爲別駕遷尙書左丞時朝廷崇樹浩以抗擬  
桓溫溫深以不平浩又引接荒人謀立功於閩外嚴言  
於浩曰當今時事艱難可謂百六之運使君屈已應務  
屬當其會聖懷所以日昃匪懈臨朝斤斤每欲深根固  
本靜邊寧國耳亦豈至私哉而處任者所至不同所見  
各異人口云云無所不至頃來天時人情良可寒心古  
人爲政防人之口甚於防川閒日侍座亦已粗申所懷  
不審竟當何以鎮之老子云夫唯不爭則萬物不能與  
之爭此言不可不察也愚意故謂朝廷宜更明授任之  
方韓彭可專征伐蕭曹守管籥內外之任各有攸司深



思廉藺屈申之道平勃相和之義令婉然通順人無間  
言然後乃可保大定功平濟天下也又觀頃日降附之  
徒皆人面獸心貪而無親難以義感而聚著都邑雜處  
人間使君常疲聖體以接之虛府庫以拯之足以疑惑  
視聽耳浩深納之及哀帝踐阼議所承統時多異議嚴  
與丹楊尹庾龢議曰順本居正親親不可奪宜繼成皇  
帝諸儒咸以嚴議爲長竟從之隆和元年詔曰天文失  
度太史雖有禳祈之事猶釁眚屢彰今欲依鴻祀之制  
於太極殿前庭親執虔肅嚴諫曰鴻祀雖出尙書大傳  
先儒所不究歷代莫之興

案江通傳曰道上疏諫曰臣  
尋史漢舊事藝文志劉向五

行傳洪祀出於其中然自前代以來莫有用者是鴻承祀卽洪祀桂氏札樸謂此二傳當錄附尙書大傳後

天接神豈可以疑殆行事乎天道無親唯德是輔陛下

祇順恭敬留心兆庶可以消災復異皆已蹈而行之德

合神明丘禱久矣豈須屈萬乘之尊修雜祀之事君舉

必書可不慎歟帝嘉之而止以爲揚州大中正嚴不就

有司奏免詔特以侯領尙書世說品藻篇注中興書曰歷丹陽尹尙書西陽侯案

本傳不言封西陽侯從略時東海王奕求海鹽錢塘以水牛牽埭稅

取錢直帝初從之嚴諫乃止御覽六百二十七晉中興書曰嚴啟宜寢表帝詔曰

奕謂此適民無損害豈奪惠卹之旨也省所啟敬納忠規初帝或施私恩以錢帛賜

左右嚴又啟諸所別賜及給廚食皆應減省帝曰左右

多困乏故有所賜今通斷之又廚膳宜有減徹思詳具

聞嚴多所匡益

世說品藻篇注引中興書作在朝多所匡正

太和中拜吳興

太守加秩中二千石善於宰牧甚得人和餘杭婦人經  
年荒賣其子以活夫之兄子武康有兄弟二人妻各有  
孕弟遠行未反遇荒歲不能兩全棄其子而活弟子嚴  
並褒薦之又甄賞才能之士論者美焉五年以疾去職  
卒于家三子道民宣城內史靜民散騎侍郎福民太子  
洗馬皆爲孫恩所害

羣字敬林嚴叔父也

世說方正篇注引會稽後賢記作羣字敬休

有智局志

尙不羈蘇峻入石頭時匡術有寵於峻賓從甚盛羣與

從兄愉同行於橫塘遇之

東晉疆域志曰圖經稱愉止實錄云橫塘在秦淮南

與語而羣初不視術術怒欲刃之愉下車抱術曰吾弟

發狂卿爲我省之乃獲免後峻平王導保存術嘗因眾

坐令術勸羣酒以釋橫塘之憾羣荅曰羣非孔子厄同

匡人雖陽和布氣鷹化爲鳩至於識者猶憎其目

世說方正

篇曰孔車騎愉與中丞羣共行在御道逢匡術賓從甚盛因往與車騎共語中丞初不視直云鷹化爲鳩眾鳥

猶惡其眼術大怒便欲刃之車騎下車抱術曰族弟發狂卿爲我省之始得全首領案鷹化二語世說謂在御

道逢術之時與本傳作導有愧色仕厯中丞

世說言語篇注孔氏

在王丞相坐上者不同

性嗜酒導嘗戒之曰卿恆飲

世說任誕篇作卿何

案本傳失載飲酒恒不見酒家覆瓿布日月久糜爛邪荅曰公不見肉

糟淹更堪久邪嘗與親友書云今年田得七百石秣米  
世說任誕篇七百斛不足了麴糴事其耽湎如此卒於官嗣  
子沈

沈字德度有美名何充薦沈於王導曰文思通敏宜登  
宰門辟丞相司徒掾琅邪王文學並不就從兄坦以裘  
遺之辭不受坦曰晏平仲儉祀其先人豚肩不掩豆猶  
狐裘數十年卿復何辭於是受而服之是時沈與魏顗  
虞球虞存謝奉並為四族之儔世說賞譽篇下曰會稽孔沈魏顗虞球虞存謝  
奉並是四族之儔于時之榮孫興公目之曰沈為孔家  
金顗為魏家玉虞為長琳宗謝為弘道伏注虞氏譜曰  
球字和琳會稽餘姚人仕至黃門侍郎政事篇注孫統  
存誄敘曰存字道長會稽山陰人幼而卓拔風情高逸

歷衛學長史尚書吏部郎御覽二百五十八  
引語林虞存爲治中魏顓謝奉見何充傳注  
沈子厥位

至吳興太守廷尉厥子琳之以艸書擅名又爲吳興太

守侍中王談傳有太守孔厥隋志梁有光祿大夫孫厥

孔厥之誤孔衍在窮記太平御覽或引作孫舒元在窮

記是其證晉書校文四曰宋書孔琳之傳父殿仕至光

祿大夫不作厥疑誘案南史孔琳之傳亦作厥宋書作

殿乃誤本南史隋志均作光祿大夫與本傳作廷尉異

宋書琳之傳琳之字彥琳累遷太尉主簿尚書左丞揚

州治中從事史尚書吏部郎平北征西長史侍中祠部

尚書琳之子邈揚州治中從事史邈子觀觀弟道存侍

丁潭

丁潭字世康會稽山陰人也祖固吳司徒文選齊故安

存江夏內史

觀子長公

陸昭王碑文

注干寶晉紀曰丁固父覽以義讓稱案世說品藻父彌篇注引會稽後賢記作吳司徒固曾孫與本傳異父彌梁州刺史譚初爲郡功曹察孝廉除郎中稍遷丞相西閭祭酒時元帝稱制使各陳時事損益譚上書曰爲國者恃人須才蓋二千石長吏是也安可不明簡其才使必允當旣得其人使久於其職在官者無苟且居下者有恆心此爲政之較也今之長吏遷轉旣數有送迎之費古人三載考績三考黜陟中才處局故難以速成矣夫兵所以防禦未然鎮壓姦凶周雖三聖功成由武今戎戰之世益宜留心簡選精銳以備不虞無事則優其身有難則責其力竊聞今之兵士或私有役使而營陣

不充夫爲國者由爲家也計財力之所任審趨舍之舉  
動不營難成之功損棄分外之役今兵人未彊當審其  
宜經塗遠舉未獻大捷更使力單財盡而威望挫弱也  
及帝踐阼拜駙馬都尉奉朝請尙書祠部郎時琅邪王  
哀始受封帝欲引朝賢爲其國上卿將用潭以問中書  
令賀循循曰郎中令職望清重實宜審授潭清淳貞粹  
雅有隱正

世說品藻篇注會稽後賢記曰沈婉有雅望少與孔愉齊名

聖明所簡才

實宜之遂爲琅邪王郎中令會哀薨潭上疏求行終喪  
禮曰在三之義禮有達制近代已來或隨時降殺宜一  
匡革以敦于後輒案令文王侯之喪官僚服斬既葬而



除今國無繼統喪庭無主臣實陋賤不足當重謬荷首  
任禮宜終喪詔下博議國子祭酒杜夷議古者諒闇三  
年不言下及周世稅衰效命春秋之時天子諸侯既葬  
而除此所謂三代損益禮有不同故三年之喪由此而  
廢然則漢文之詔合於隨時凡有國者皆宜同也非唯  
施於帝皇而已案禮殤與無後降於成人有後既葬而  
除今不得以無後之故而獨不除也愚以丁郎中應除  
衰麻自宜主祭以終三年太常賀循議禮天子諸侯俱  
以至尊臨人上下之義君臣之禮自古以來其例一也  
故禮盛則並全其重禮殺則從其降春秋之事天子諸

侯不行三年至於臣爲君服亦宜以君爲節未有君除而臣服君服而臣除者今法令諸侯卿相官屬爲君斬衰旣葬而除以令文言之明諸侯不以三年之喪與天子同可知也君若遂服則臣子輕重無應除者也若當皆除無一人獨重之文禮有攝主而無攝重故大功之親主人喪者必爲之再祭練祥以大功之服主人三年喪者也苟謂諸侯與天子同制國有嗣王自不全服而人主居喪素服主祭三年不攝吉事以尊令制若當違迹三代令復舊典不依法令者則侯之服貴賤一例亦不得唯一人論於是詔使除服心喪三年太興三年遷

王導驃騎司馬轉中書郎出爲廣武將軍東陽太守以  
清潔見稱徵爲太子左衛率不拜成帝踐阼以爲散騎  
常侍侍中蘇峻作亂帝蒙塵於石頭唯潭及侍中鍾雅  
劉超等隨從不離帝側峻誅以功賜爵永安伯遷大尙  
書徙廷尉累遷左光祿大夫領國子祭酒本國大中正  
加散騎常侍康帝卽位屢表乞骸骨詔以光祿大夫還  
第門施行馬祿秩一如舊制給傳詔二人賜錢二十萬  
牀帳褥席年八十卒贈侍中大夫如故諡曰簡王導嘗  
謂孔敬康有公才而無公望丁世康有公望而無公才  
子話位至散騎侍郎

張茂

張茂字偉康少單貧有志行爲鄉里所敬信初起義兵

討賊陳斌

御覽四百三十九引  
晉中興書作陳武

一郡用全元帝辟爲掾

屬官有老牛數十將賣之茂曰殺牛有禁買者不得輒

屠齒力疲老又不任耕駕是以無用之物收百姓利也

帝乃止遷太子右衛率出補吳興內史沈充之反也茂

與三子竝遇害茂弟盎爲周札將軍充討札盎又死之

贈茂太僕茂少時夢得大象以問占夢萬推

世說品藻  
篇注引會

稽後賢記  
作萬雅

推曰君當爲大郡而不善也問其故推曰象

者大獸獸者守也故知當得大郡然象以齒焚爲人所

害果如其言

世說品藻篇注會稽後賢記曰取其音狩故為大郡然象以齒喪身後為吳郡果為

沈充所殺

### 陶回

陶回

案書鈔七十三引晉中興書丹陽陶錄作陶洄字恭潤洄蓋回之譌文御覽二百九引陶氏家傳作

迴字恭淵又二百四十引晉中興書誤作字恭之四百二十八引晉中興書誤作紀回字恭則案唐人避諱故本書如陳騫字休淵亦不書其字

陶回之字當作恭淵非恭潤也丹楊人也祖基吳交

州刺史父抗太子中庶子回辟司空府中軍主簿竝不

就大將軍王敦命為參軍轉州別駕書鈔七十三晉中興書丹陽陶錄曰

仍稱州治中別敦死司徒王導引為從事中郎御覽二

氏家傳曰為大司徒王導從事中郎為人正直不撓導亦以此重焉每言曰陶中郎有輔佐之才真國器也

遷司馬蘇峻之役回與孔坦言於導請早出兵守江口  
語在坦傳峻將至回復謂亮曰峻知石頭有重戍不敢  
直下必向小丹楊南道步來

周家祿校勘記曰上無所承亮上宜加庾字東晉疆

域志曰丹陽郡城元和郡縣志初爲丹陽內史後改爲  
尹寰宇記城晉武帝太康元年築也按丹陽郡治俗謂  
之小丹陽卽晉書陶回謂庾亮曰

峻必向小丹陽道步來卽此也

宜伏兵要之可一戰

而擒亮不從峻果由小丹楊經秣陵迷失道逢郡人執  
以爲鄉導時峻夜行甚無部分亮聞之深悔不從回等  
之言尋王師敗績回還本縣收合義軍得千餘人竝爲  
步軍與陶侃溫嶠等并力攻峻又別破韓晃以功封康  
樂伯時犬賊新平綱維弛廢司徒王導以回有器幹擢

補北軍中候俄轉中護軍久之遷征虜將軍吳興太守  
時人饑穀貴三吳尤甚詔欲聽相鬻賣以拯一時之急  
回上疏曰當今天下不普荒儉唯獨東土穀價偏貴便  
相鬻賣聲必遠流北賊聞之將窺疆場如愚臣意不如  
開倉廩以振之乃不待報輒便開倉及割府郡軍資數  
萬斛米以救乏絕由是一境獲全既而下詔并勅會稽  
吳郡依回振恤二郡賴之在郡四年徵拜領軍將軍加  
散騎常侍征虜將軍如故回性雅正

御覽四百二十八  
引晉中興書作回

雅性  
方範

不憚疆禦丹楊尹桓景佞事王導甚爲導所昵回

常慷慨謂景非正人不宜親狎會熒惑守南斗經旬導

語回曰南斗楊州分而災惑守之吾當遜位以厭此譴  
回荅曰公以明德作相輔弼聖主當親忠貞遠邪佞而  
與桓景造膝焚惑何由退舍導深愧之咸和二年以疾  
辭職帝不許徙護軍將軍常侍領軍如故未拜卒年五  
十一謚曰威四子汪陋隱無忌汪嗣爵位至輔國將軍

宣城內史

類聚六陶氏家傳曰陶汪晉咸康中爲宣城

開學舍以此教民民有向方者則辟爲掾吏百陋冠軍

姓歌之曰人當勤學得主簿誰使爲之陶明府將軍隱少府無忌光祿勳兄弟咸有幹用

史臣曰孔愉父子暨丁潭等咸以篠簜之材邀締構之  
運策名霸府騁足高衢厯試清階遂登顯要外宣政績



內盡謀猷罄心力以佐時竭股肱以衛主竝能保全名  
節善始令終而愉高謝百萬之貲辭榮數畝之宅弘止  
足之分有廉讓之風者矣陶回陳邪佞之宜遠明鬻賣  
之非宜並補闕彌違良可稱也

贊曰愉旣公才潭唯公望領軍儒雅平越忠亮君平料  
敵彭祖弘益茂以象焚羣由匡厄陶回規過言同金石

晉書斟注卷七十九

錢塘吳士鑑

同注

烏程劉承幹

列傳第四十九

謝尚

謝尚字仁祖豫章太守鯤之子也幼有至性七歲喪兄

世說言語篇注引晉陽秋七歲作鰥鰥

哀慟過禮親戚異之八歲神悟夙

成鯢嘗攜之送客或曰此兒一坐之顏回也

坐一作座世說言語

篇曰謝豫章將送客爾時語已神悟自參上流諸人咸共歎之曰年少一坐之顏回

尚應聲答曰

坐無尼父焉別顏回席賓莫不歎異十餘歲遭父憂丹

楊尹溫嶠弔之尙號咷極哀

世說言語篇注引晉陽秋弔作嘯咷作叫御覽七百

十塔寺記曰謝尙夢其父告之曰西南有氣至衛人必死勿當其鋒見塔寺可禳未暇立寺杖頭刻作塔形見有氣來指之尙如其言置杖左右果有黑氣衝尙家尙以杖指之氣卽迴散闔門獲全氣所經處數里無復子遺既而收涕告訴舉止有異常童嶠甚奇之及長開率

穎秀辨悟絕倫

世說賞譽篇下曰世目謝尙爲令達阮遙集云清暢似達或云尙自然令上注

晉陽秋曰尙率易

脫略細行

世說任誕篇注宋明帝文章志曰尙性輕率不拘細

行兄葬後往墓還王濛劉惔共游新亭濛欲招尙先以問惔曰謝仁祖正當不爲異同耳惔曰仁祖韻中自應來乃遣要之尙初辭然已無歸意及再請卽回軒焉其率如此

不爲流俗之事好衣刺

文袴諸父責之因而自改遂知名善音樂

世說容止篇曰桓大司馬

日諸君莫輕道仁祖企腳北窗下彈琵琶故自有天際真人想注引裴子曰堅石挈腳枕琵琶堅石尙小名任

誕篇注晉陽秋曰向性通任善音樂書鈔一百十俗說云謝仁祖爲豫州主簿在桓溫閣下桓聞其善箏使呼之既至取箏與彈謝卽理絃撫箏因博綜眾藝司徒王而歌秋風意氣殊異桓以此知之

導深器之比之王戎常呼爲小安豐世說任誕篇曰王公熟視謂客曰使

人思安豐注云戎辟爲掾襲父爵咸亭侯始到府通謁性通任尙似之

導以其有勝會謂曰聞君能作鵲鴒舞世說任誕篇曰長史云謝掾能

作異舞謝便起舞神意甚暇注語林曰謝鎮西酒後於槃案間爲洛市肆工鸛鴒舞甚佳一坐傾想

宥有此理不尙曰佳便著衣幘而舞導令坐者撫掌擊

節尙俯仰在中傍若無人其率詣如此轉西曹屬時有

遭亂與父母乖離議者或以進仕理王事婚姻繼百世

於理非嫌案通典九十八引孫綽虞潭蔡謨環濟虞預江泉王愆期父母乖離議劉隗奏定父母乖

離制孔衍乖離論蓋  
皆同時所上議也 尙議曰典禮之興皆因循情理開

通引勝如運有屯夷要當斷之以大義夫無後之罪三千所不過今婚姻將以繼百世崇宗緒此固不可塞也然至於天屬生離之哀父子乖絕之痛痛之深者莫深於茲夫以一體之小患猶或忘思慮損聽察況於抱傷心之巨痛懷忉怛之至戚方寸旣亂豈能綜理時務哉有心之人決不冒榮苟進冒榮苟進之疇必非所求之旨徒開偷薄之門而長流弊之路或有執志丘園守心不革者猶當崇其操業以弘風尙而況含艱履感之人勉之以榮貴邪遷會稽王友人補給事黃門侍郎出爲

建武將軍厯陽太守轉督江夏義陽隨三郡軍事江夏  
相將軍如故時安西將軍庾翼鎮武昌尙數詣翼諮謀  
軍事嘗與翼共射翼曰卿若破的當以鼓吹相賞尙應  
聲中之翼卽以其副鼓吹給之尙爲政清簡始到官郡  
府以布四十匹爲尙造烏布帳尙壞之以爲軍士襦袴  
建元二年詔曰尙往以戎戍事要故輟黃散以授軍旅  
所處險要宜崇其威望今以爲南中郎將餘官如故會  
庾冰薨復以本號督豫州四郡領江州刺史俄而復轉  
西中郎將督揚州之六郡諸軍事豫州刺史廿二史攷  
異二十二  
日六郡謂淮南廬江厯  
陽安豐堂邑宣城也假節鎮厯陽大司馬桓溫欲有

事中原使尙率眾向壽春進號安西將軍初苻健將張

遇降尙

周家祿校勘記曰案遇本石氏故將永和七年及冉閔以許昌歸順後爲苻雄所虜始歸苻氏

此不得云苻健將也

尙不能綏懷之遇怒據許昌叛尙討之爲遇

所敗收付廷尉時康獻皇后臨朝卽尙之甥也特令降

號爲建威將軍初尙之行也使建武將軍濮陽太守戴

施據枋頭會冉閔之子智與其大將蔣幹來附復遣行

人劉猗詣尙請救施止猗求傳國璽猗歸以告幹幹謂

尙已敗慮不能救已猶豫不許施遣參軍何融率壯士

百人入鄴登三臺助戍謫之曰今且可出璽付我凶寇

在外道路梗澀亦未敢送璽當遣單使馳白天子聞璽

已在吾許知卿等至誠必遣重軍相救并厚相餉幹乃  
出璽付融融齋璽馳還枋頭尙遣振武將軍胡彬率騎  
三百迎璽致諸京師時苻健將楊平戍許昌尙遣兵襲  
破之徵授給事中賜輅車鼓吹戍石頭永和初拜尙書  
僕射出爲都督江西淮南諸軍事前將軍豫州刺史給  
事中僕射如故鎮歷陽加都督豫州揚州之五郡軍事

廿二史攷異二十二日前云六郡此云五郡者不數宣城也六郡惟宣城在江東此云都督江西淮南則宣城不在所督

在任有政績上表求入朝因留京師署僕射之內矣

事尋進號鎮西將軍鎮壽陽

穆帝紀作鎮馬頭元和郡縣圖志二十八日牛渚山

在當塗縣北三十五里晉左衛將軍謝尙鎮於此樂府詩集七十五樂府廣題曰謝尙爲鎮西將軍嘗著紫羅



稽據胡牀在市中佛國門樓上彈琵琶作大道曲市人不知是三公也案本傳下文云徵拜衛將軍加散騎常侍未至卒於厯陽蓋尚雖拜衛將軍未嘗涖官其在鎮時實為鎮西不得云衛將軍也左傳杜注塗山在壽春東北當塗置縣因山得名尚之向於是採拾樂人并制鎮壽陽即在當塗牛渚山也

石磬以備太樂江表有鍾石之樂自尚始也桓溫北平

治陽上疏請尚為都督司州諸軍事世說賞譽篇下注溫集載其平洛表

曰今中州既平宜時綏定鎮西將軍豫州刺史尚神懷

挺率少致人譽是以入贊百揆出蕃方司宜進據洛陽

撫宣黎庶謂可木官將鎮洛陽以疾病不行升平初又

都督司州諸軍事進都督豫冀幽并四州周家祿校勘記曰穆帝紀永和

是年進號鎮西將軍今按傳進號鎮西在永和進督

四州正在此時蘇州刺史又進都督云云宜移接上進號鎮西將軍文下病篤徵

拜衛將軍加散騎常侍未至卒於歷陽時年五十詔贈散騎常侍衛將軍開府儀同三司諡曰簡無子從弟奕以子康襲爵早卒康弟靜復以子肅嗣又無子靜子虔以子靈祐繼鯤後

謝安

安子珍

珍子混

安弟萬

萬弟石

安兄奕

奕子玄

石兄子朗

弟子邁

周家祿校勘記曰總目子珍上無安字安弟萬萬弟石六字在奕子玄下

謝安字安石尚從弟也父裒太常卿

世說德行篇注引中興書曰裒吏部

尚書方正篇注永嘉流人名曰裒字幼儒歷侍中吏部尚書吳國內史案此作太常卿疑誤

安年四

歲時譙郡桓彝見而歎曰此兒風神秀徹後當不減王

東海

世說德行篇注文字志曰謝安世有學行安弘粹通遠溫雅融暢桓彝見其四歲時稱之曰此兒風

神秀微當繼蹤王東海文學篇注及總角神識沈敏風

宇條暢

世說賞譽篇下注續晉陽秋曰安弘雅有氣風

深敏風宇

善行書

太平廣記二百七書斷曰謝安石學

作氣宇難安石尤善行書亦猶衛洗馬風流名士海內

妙

所瞻王僧虔云謝安入能書品錄也安石隸行草并入

人濛曰此客疊疊

世說賞譽篇下此客作向客

為來逼人王導亦深

器之由是少有重名初辟司徒府除佐著作郎並以疾

辭寓居會稽與王羲之及高陽許詢桑門支遁遊處

世說

賞譽篇下注續晉陽秋曰初安家於會稽上虞縣優遊

山林御覽四百七晉中興書曰東甌沃壤名士多樂居

之太傅謝安未仕時亦居東土共王羲之孫

出則漁弋

綽李充許詢道林皆文義冠世共相友昵

山水入則言詠屬文

世說雅量篇注引中興書言詠作談說

無處世意揚

州刺史庾冰以安有重名必欲致之累下郡縣敦逼不

得已赴召月餘告歸復除尚書郎琅邪王友並不起吏

部尚書范汪舉安爲吏部郎安以書距絕之有司奏安

被召歷年不至禁錮終身

世說賞譽篇下注續晉陽秋曰六七年閒徵召不至雖彈

奏相屬繼以禁錮而晏然不屑也

遂棲遲東土嘗往臨安山中坐石室

臨濬谷悠然歎曰此亦伯夷何遠嘗與孫綽等汎海風

起浪湧諸人並懼安吟嘯自若舟人以安爲悅猶去不

止風轉急安徐曰如此將何歸邪舟人承言卽迴眾咸

服其雅量

世說雅量篇曰謝太傅盤桓東山時與孫興公諸人汎海戲風起浪湧孫王諸人色並遽

便唱使還太傅神情方王吟嘯不言舟人以公貌閑意說猶去不止既風轉急浪猛諸人皆誼慙不坐公徐云如此將無歸眾人即承響而回安雖放情丘壑然每游於是審其量足以鎮安朝野

安雖放情丘壑然每游

賞必以妓女從

世說識鑒篇注宋明帝文章志曰安縱心事外疏略常節每畜女奴攜持游肆

也既累辟不就簡文帝時爲相曰安石既與人同樂必

不得不與人同憂

世說識鑒篇必不得作亦不得書鈔一百十二引郭子作安石必出與人

同樂亦何得不與人同憂召之必至時安弟萬爲西中郎將總藩任

之重安雖處衡門其名猶出萬之右

世說品藻篇注中興書曰安在私門

之時名稱居萬上

自然有公輔之望處家常以儀範訓子弟安

妻劉惔妹也既見家門富貴而安獨靜退乃謂曰丈夫

不如此也

世說德行篇曰謝公夫人教兒問太傅那得初不見君教兒答曰我常自教兒注謝氏譜

曰安娶沛國劉耽女排調篇曰初謝安在東山居布衣時兄弟已有富貴者翕集家門傾動人物劉夫人戲謂安曰大丈夫不當如此乎御覽五百二十一妬記曰謝太傅劉夫人不令太傅有別房寵公既深好聲色不能令節遂頗欲立妓妾兄子及外甥等微達其旨乃共諫劉夫人方便稱關雎螽斯有不妒忌之德夫人知諷己乃問誰撰詩答曰周公夫人曰周公是男安掩鼻曰恐子乃相爲耳若使周姥傳應无此語也

不免耳及萬黜廢安始有仕進志時年已四十餘矣征西大將軍桓溫請爲司馬將發新亭朝士咸送中丞高

崧戲之曰卿累違朝旨高卧東山

世說排調篇曰高靈時爲中丞亦往相祖

先時多少飲酒因倚如醉戲曰卿屢違朝旨案高崧本傳小字曰阿鄴故世說稱之爲高靈讀史方輿紀要九十二曰東山在上虞縣西南四十五里諸人每相與言安石不肯出將如

蒼生何蒼生今亦將如卿何安甚有愧色既到溫甚喜

言生平歡笑竟日既出溫問左右頗嘗見我有如此客  
不溫後詣安值其理髮安性遲緩久而方罷使取幘溫  
見留之曰令司馬著帽進其見重如此溫當北征會萬  
病卒安投牋求歸尋除吳興太守在官無當時譽去後  
爲人所思寰宇記九十四曰謝塘在烏程縣西四里晉  
太守謝安開塘大厯刺史裴清于州西起謝  
館頃之徵拜侍中遷吏部尙書中護軍簡文帝疾篤溫  
上疏薦安宜受顧命及帝崩溫入赴山陵止新亭大陳  
兵衛將移晉室呼安及王坦之欲於坐害之坦之甚懼  
問計於安世說雅量篇曰桓公伏甲設饌廣延朝士因  
此欲誅謝安王坦之王坦之王甚遽問謝曰當作何  
計注晉安帝紀曰入赴山陵百官拜于道側安神色不  
在位望者戰慄失色或云自此欲殺王謝

變曰晉祚存亡在此一行既見溫坦之流汗沾衣倒執

手版安從容就席坐定

世說雅量篇曰王之恐狀轉見於色謝之寬容愈表於貌望階

趨席方作洛生詠諷浩浩洪流注宋明帝文章志謂溫曰安神姿舉動不異於常舉目徧歷溫左右衛士

曰安聞諸侯有道守在四鄰明公何須壁後置人邪

世說

雅量篇注引宋明帝文章志作明公何有壁閒著阿堵輩

溫笑曰正自不能不爾耳

遂笑語移日

世說雅量篇曰桓惲其曠遠乃趣解兵注宋明帝文章志曰於是矜莊之心頓盡命

部左右促燕行

坦之與安初齊名至是方知坦之之劣

溫嘗以安所作簡文帝謚議以示坐賓

世說文學篇曰桓公見謝安石

作簡文謚議看竟擲與坐上諸客注劉謙之晉紀載安議曰謹按謚法一德不懈曰簡道德博聞曰文易簡而天下之理得觀乎人文化成天下儀之景行猶有仿佛宜尊號曰太宗謚曰簡文舊唐志儀注類晉簡文謚議



四卷曰此謝安石碎金也時孝武帝富於春秋政不自己

溫威振內外人情尊嗜互生同異安與坦之盡忠匡翼

終能輯穆及溫病篤諷朝廷加九錫使袁弘具艸安見

輒改之由是厯旬不就會溫薨錫命遂寢宏本傳及王彪之傳均作

宏不作弘類聚五十三晉中興書曰使驍騎將軍袁宏具草時溫以疾篤宏以呈安安視輒曰不好更勾改之

使彌厯旬日至於溫薨錫命遂寢尋爲尙書僕射領吏部加後將軍及

中書令王坦之出爲徐州刺史詔安總關中書事安義

存輔導雖會稽王道子亦賴弼諧之益時彊敵寇境邊

書續至梁益不守樊鄧陷沒安每鎮以和靖御以長算

德政旣行文武用命世說政事篇注續晉陽秋曰自中原喪亂民離本域江左造創豪族

并兼或客寓流離名籍不立太元中外禦強氏蒐簡民  
實三吳頗加澄檢正其里伍其中時有山湖遁逸往來  
都邑者後將軍安方接客時人有於坐言宜糺舍藏之  
失者安每以厚德化物去其煩細又以強寇入境不宜  
加動人情乃答之云卿所憂在於客不存小察弘以大  
耳然不爾何以爲京都言者有慚色

綱威懷外著人皆比之王導謂文雅過之嘗與王羲之  
登冶城悠然遐想有高世之志世說言語篇注揚州記  
吳平猶不廢王茂弘所治也輕詆篇注丹陽記曰丹陽  
治城去宮三里又曰孫權築治城爲鼓鑄之所既立石  
頭大鵬不容近立此小城當是徙縣治空城而置治爾  
治城疑是金陵本治漢高六年令天下縣西五里徐廣晉  
獨無寰宇記九十曰古治城在上元縣西五里徐廣晉  
紀成帝遣司徒府游觀治城之園卽此讀史方輿紀要  
二十曰治城在府西石城門外惜抱軒筆記曰逸少誓  
墓之後未嘗更入都而安之仕進在逸少去官後安在  
官而有遠想遺事之過逸少安得規之此事亦出於世  
說則世說之妄唐時執筆者蓋乏學識故所取舍皆謬

義之謂曰夏禹勤王手足胼胝文王盱食日不暇給今

四郊多壘宜思自效

世說言語篇作  
宜人人自效

而虛談廢務浮文

妨要恐非當今所宜安曰秦任商鞅二世而亡豈清言  
致患邪是時宮室毀壞安欲繕之尙書令王彪之等以  
外寇爲諫安不從竟獨決之宮室用成皆仰模立象合  
體辰極而役無勞怨又領揚州刺史詔以甲仗百人入  
殿時帝始親萬機進安中書監驃騎將軍錄尙書事固  
讓軍號于時懸象失度亢旱彌年安奏興滅繼絕求晉  
初佐命功臣後而封之頃之加司徒後軍文武盡配大  
府又讓不拜復加侍中都督楊豫徐兗青五州幽州之

燕國諸軍事假節

十駕齋養新錄曰謝玄傳亦云都督徐兗青三州揚州之晉陵幽州之燕

國諸軍事江左僑置燕國惟見此二條而地理志未之及焉攷宋書州郡志南徐州淮陵下云永初郡國又有

下相廣陽二縣廣陽當是燕國屬縣時苻堅強盛疆場義熙土斷後省燕國并入淮陵郡也

多虞諸將敗退相繼安遣弟石及兄子玄等應機征討

所在剋捷拜衛將軍開府儀同三司封建昌縣公堅後

率眾號百萬次于淮肥京師震恐加安征討大都督玄

入問計安夷然無懼色荅曰已別有旨旣而寂然玄不

敢復言乃令張玄重請安遂命駕出山墅親朋畢集方

與玄圍碁賭別墅安常基劣於玄

寰宇記九十曰古檀城在金華橋東晉謝

安石圍碁賭得別墅乞與外甥羊曇卽此也宋屬檀道濟緣以爲名是日玄懼便爲敵手

而又不勝安顧謂其甥羊曇曰以墅乞汝安遂游涉至

夜乃還指授將帥各當其任立等既破堅有驛書至世說

雅量篇作俄而安方對客圍碁看書既竟便攝放牀上謝立淮上信至

了無喜色碁如故客問之徐荅云小兒輩遂已破賊世說

雅量篇作徐向局客問淮上利害荅曰既罷還內過戶

小兒輩大破賊意色舉止不異於常限心喜甚不覺屐齒之折其矯情鎮物如此以總統功

進拜太保安方欲混一文軌上疏求自北征乃進都督

揚江荆司豫徐兗青冀幽并益雍梁十五州軍事孝武

帝紀益雍梁加黃鉞其本官悉如故置從事中郎二

人安上疏讓太保及爵不許文選齊故安陸昭王碑文

注晉中興書曰謝安石上

疏曰尸素朝是時桓冲既卒荆江二州竝缺物論以玄端忽焉五載

勳望宜以授之安以父子皆著大勲恐為朝廷所疑又

懼桓氏失職桓石虔復有沔陽之功慮其驍猛在形勝

之地終或難制乃以桓石民為荊州改桓伊於中流石

虔為豫州廿二史攷異二十二曰是時桓伊為豫州刺史改除江州以石虔代之云中流者江州介

荆揚之中也然既以三桓據三州彼此無怨各得所任

詞意未甚明白其經遠無競類皆如此性好音樂自弟萬喪十年不聽

音樂及登台輔世說甚喪不廢樂王坦之書喻之不從賞譽

篇下注續晉陽秋曰謝安初攜幼釋同好養志海濱襟情超暢尤好聲律然抑之以禮在哀能至弟萬之喪不聽竹絲者將十年及輔政而修室第園館麗車服雖期功之慘不廢妓樂王坦之因苦諫焉衣冠效

之遂以成俗又於土山營墅樓館林竹甚盛每攜中外  
子姪往來游集肴饌亦屢費百金世頗以此譏焉而安  
殊不以屑意常疑劉牢之既不可獨任又知王味之不  
宜專城牢之既以亂終而味之亦以貪敗由是識者服  
其知人時會稽王道子專權而姦諂頗有元無有字相扇構  
安出鎮廣陵之步上築壘曰新城以避之讀史方輿紀要二十三日  
新城在揚州府北二十五里帝出祖於西池獻觴賦詩焉安雖受朝

寄然東山之志始末不渝每形於言色及鎮新城盡室  
而行造汎海之裝欲須經略粗定自江道還東雅志未  
就遂遇疾篤上疏請量宜旋旆并召子征虜將軍珍解

甲息徒命龍驤將軍朱序進據洛陽前鋒都督立抗威  
彭沛委以董督若二賊假延來年水生東西齊舉詔遣  
侍中慰勞遂遣都聞當與入西州門自以本志不遂深  
自慨失因悵然謂所親曰昔桓溫在時吾常懼不全忽  
夢乘溫輿行十六里見一白雞而止乘溫輿者代其位  
也十六里止今十六年矣白雞主酉今太歲在酉吾病  
殆不起乎御覽三百九十八幽明錄曰後果代居宰相  
歷十六年而得疾安方悟曰見雞住者今太  
歲在酉吾病殆將不起廿二史攷異二十二日按桓溫  
以宣康元年薨安始代之至太元十年乙酉祇十有三  
年乃上疏遜位詔遣侍中尙書喻旨先是安發石頭金  
鼓忽破又語未嘗謬而忽一誤眾亦怪異之尋薨時年



六十六

太平廣記一百四十一異苑曰謝安於後府接賓婦劉氏見狗銜安頭來久之乃失所在是月

安帝三日臨于朝堂賜東園祕器朝服一具衣一襲錢

百萬布千匹蠟五百斤贈太傅諡曰文靖以無下舍詔

府中備凶儀及葬加殊禮

元和郡縣圖志二十五曰謝安墓在上元縣東南十里石

子岡北御覽五百八十九李綽尚書故實曰東晉謝太傅墓碑樹貞石初無文字蓋重難製述之意宸宇記九

十四曰長興縣南六十五里三鳴岡有晉太傅謝安墓輿地紀勝四曰謝安墓在長興縣南六十五里三鳴村

安初葬建康之梅山陳始興王叔陵發其墓安裔孫長城令夷吾徙葬于此有大觀三年墓田碑案紀勝卷十

又云謝安墓在上虞不足信

依大司馬桓溫故事又以平苻堅勳更

封廬陵郡公安少有盛名時多愛慕鄉人有罷中宿縣

者還詣安安問其歸資荅曰有蒲葵扇五萬安乃取其

中者捉之京師士庶競市價增數倍

御覽七百二續晉陽秋曰安問其歸

貨答曰嶺南凋弊惟有五萬蒲葵扇謂非時爲滯貨安

乃取其一中者捉之於是京都士庶競而慕焉價增數

倍旬日則

無所賣安本能爲洛下書生詠有鼻疾故其音濁名

流愛其詠而弗能及或手掩鼻以敬之及至新城築埭

於城北後人追思之名爲召伯埭

御覽七十三引晉中興書作百姓賴之故

名召伯埭寰宇記一百二十三曰謝安于武城東北二

十里築壘名曰新城城北二十里築堰名邵伯埭讀史

方輿紀要二十三曰邵伯湖在揚州府北四十五里羊

東接艾陵湖西接白茆湖南通新城湖旁有邵伯埭羊

曇者太山人知名士也爲安所愛重安薨後輟樂彌年

行不由西州路嘗因石頭大醉扶路唱樂不覺至州門

左右白曰此西州門曇悲感不已以馬策扣扉誦曹子

建詩曰生存華屋處零落歸山丘慟哭而去安有二子  
瑤瑤瑤襲爵官至琅邪王友早卒子該嗣終東陽太守  
無子弟光祿勳模以子承伯嗣有罪國除劉裕以安勳  
德濟世特更封該弟澹爲柴桑侯邑千戶奉安祀澹少  
厯顯位桓玄篡位以澹兼太尉與王謐俱齋冊到姑孰  
南史本傳曰澹字景恆案書鈔三十二義熙起居注曰  
十二年有司奏太常謝瞻遺四人種葱免官御覽九百  
七十九引作十年謝瞻作謝瞻是書鈔誤元熙中爲光  
作瞻也澹爲太常當在桓玄既滅之後

祿大夫復兼太保持節奉冊禪宋

瑤字瑗度

書鈔六十四引晉中興書誤作字瑗瓊文選

錄作字瑗度安少子也世說弱冠以貞幹稱美風姿與

傷逝篇注曰末婢謝珍小字

從兄護軍淡雖比居不往來宗中子弟惟與才令者數  
人相接拜著作郎轉祕書丞累遷散騎常侍侍中苻堅  
之役安以琚有軍國才用出爲輔國將軍以精卒八千  
與從兄玄俱陷陣破堅書鈔六十四晉中興書曰用以  
爲輔國將軍領入千人距氏破  
賊有勳焉又一百三十九晉起居注曰晉泰元八年輔  
國將軍謝琚送苻堅爲臥車各一乘案苻堅載記下云  
謝玄謝琚勒卒數萬陣以待之以勳封望蔡公  
注誤以望蔡爲謝琚小字  
尋遭父憂去官服闋除征虜將軍會稽內  
史頃之徵爲尚書右僕射領太子詹事加散騎常侍將  
軍如故又遭母憂朝廷疑其葬禮時議者云潘岳爲賈  
充婦宜城宣君誄云昔在武侯喪禮殊倫伉儷一體朝

儀則均謂宜資給葬禮悉依太傅故事先是王珣娶萬  
女珣弟珉娶安女竝不終由是與謝氏有隙珣時爲僕  
射猶以前憾緩其事珣聞恥之遂自造輜輶車以葬議  
者譏之太元末爲護軍將軍加右將軍會稽王道子以  
爲司馬右將軍如故王恭舉兵假珣節都督前鋒軍事  
恭平遷衛將軍徐州刺史假節孫恩作亂加督吳興義  
興二郡軍事討恩至義興斬賊丘垤破之又詔珣與輔國將軍  
郡安帝紀作魏隱進討吳興賊丘垤破之又詔珣與輔國將軍  
劉牢之俱討孫恩恩逃於海島朝廷憂之以珣爲會稽  
內史都督五郡軍事

廿二史劄異二十二日五郡者本  
會稽新安東海臨海永嘉也

官竝如故琰既以資望鎮越土議者謂無復東顧之虞  
及至郡無綏撫之能而不爲武備將帥皆諫曰強賊在  
海伺人形便宜振揚仁風開其自新之路琰曰苻堅百  
萬尙送死淮南況孫恩奔衄歸海何能復出若其復至  
正是天不養國賊令速就戮耳遂不從其言恩後果復  
寇浹口書鈔一百十八引晉中興書入餘姚破一無上  
日隆安四年孫恩復寇浹口虞進及邢浦去山陰北三十五里讀史方輿紀要九十  
東北今府東北四十五里有琰遣參軍劉宣之距破恩  
蟬浦或以爲卽邢浦之譌既而上黨太守張虔碩戰敗羣賊銳進人情震駭咸以  
宜持重嚴備且列水軍於南湖書鈔一百十八晉中興  
書日上黨太守張虔碩

戰敗于邢浦人情畏懼羣賊盡銳東晉疆域志曰山陰縣有南湖卽此諸史拾遺曰案東晉僑立上黨郡有二

皆見於宋志其一徐州淮南郡有襄垣令晉末上黨民南過

省來配其一揚州淮南郡有襄垣令晉末上黨民南過

江立僑郡縣寄治蕪湖後分兵設伏以待之珍不聽賊

省上黨郡爲縣屬淮南書鈔一百十八晉中興書珍曰要當先滅

既至尙未食書鈔一百十八晉中興書珍曰要當先滅

此寇而後後字無食也元作跨馬而出廣武將軍桓寶爲

前鋒摧鋒陷陣殺賊甚多御覽三百二十三引晉中興書作果敢能戰殺賊甚多

而塘路迮狹珍軍魚貫而前御覽三百二十三引晉中興書作魚貫不聚賊

於艦中傍射之前後斷絕珍至千秋亭敗績東晉疆域志曰山陰縣有千秋亭

六引續晉陽秋作恩帳下都督張猛案當從孫盛作恩

帳下都督爲是珍既戰敗立爲恩帳下所斬斷無出

自珍帳與二子肇峻俱被害寶亦死之後劉裕左里之下之理捷生擒猛送珍小子混混刳肝生食之詔以珍父子隕於君親忠孝萃於一門贈珍侍中司空謚曰忠肅三子肇峻混肇厯驃騎參軍峻以珍勲封建昌侯及沒於賊詔贈肇散騎常侍峻散騎侍郎

混字叔源少有美譽

書鈔一百六謝妮臨作歌記曰余

一風土記曰王高麗年十四五時四月八日在彭城佛寺中謝混見而以檳榔贈之執王手謂曰王郎謝叔源可與周善屬文  
世說言語篇注晉安帝紀曰混文學孤  
旋否  
善屬文  
礪立名隋志有左僕射謝混集三卷宋  
書謝靈運傳論曰仲文始革孫許之初  
風叔源大變太元之氣叔源混字也  
初孝武帝爲晉陵  
公主求壻謂王珣曰主壻但如劉眞長王子敬便足如



王處仲桓元子誠可才小富貴便豫人家事

世說排調篇作王敦

桓溫磊砢之流既不可復得且小如意亦好

豫人家事酷非所須正如真長子敬比最佳

混雖不及真長不減子敬帝曰如此便足未幾帝崩袁

崧欲以女妻之

世說排調篇作袁山松欲擬謝婚案袁崧當作袁山松

玠曰卿莫

近禁巒初元帝始鎮建業公私窘罄每得一狔以爲珍

膳項上一巒尤美輒以薦帝羣下未嘗敢食于時呼爲

禁巒故玠因以爲戲混竟尙主襲父爵桓玄嘗欲以安

宅爲營混曰召伯之仁猶惠及甘棠文靖之德更不保

五畝之宅邪玄聞慙而止歷中書令中領軍尙書左僕

射領選

書鈔六十四續晉陽秋曰射領作混字叔源求領戎行板拜征虜將軍不開事頓眾防而者也

案傳失載爲將軍書鈔所引末句有脫誤以黨劉毅誅國除及宋受禪謝晦

謂劉裕曰陛下應天受命登壇日恨不得謝益壽奉璽  
紱裕亦歎曰吾甚恨之使後生不得見其風流益壽混

小字也

奕字無奕少有名譽初爲剡令

世說德行篇注中與書曰奕少有器鑒辟太尉

掾剡令簡傲篇注中與書曰奕自吏部郎出爲晉  
陵太守案本傳僅言爲剡令於先後歷官均失載有老  
人犯法奕以醇酒飲之醉猶未已安時年七八歲在奕

膝邊諫止之奕爲改容遣之

世說德行篇曰有一老翁犯法謝以醇酒罰之乃至

過醉而猶未已太傅時年七八歲著青布袴在兄膝邊  
坐諫曰阿兄老翁可念何可作此奕於是改容曰阿奴  
欲放去耶與桓溫善溫辟爲安西司馬

世說簡傲篇曰桓宣武作徐州

時謝奕爲晉陵先粗經虛懷而乃無異常及桓遷荊州  
將西之閒意氣甚篤奕弗之疑唯謝虎子婦王愔其旨  
每日桓荊州用意殊異必與晉  
陵俱西矣俄而引奕爲司馬 猶推布衣好在溫坐岸

嘖笑詠

世說簡傲篇  
笑詠作嘖詠

無異常日桓溫曰我方外司馬奕

每因酒無復朝廷禮嘗逼溫飲溫走入南康主閒避之

世說簡傲篇作遂飲酒轉無朝夕禮桓舍入  
內奕輒復隨去後至奕醉溫往主許避之主曰君若

無狂司馬我何由得相見奕遂攜酒就聽事引溫一兵

帥共飲曰失一老兵得一老兵亦何所在溫不之責從

兄尙有德政旣卒爲西藩所思朝議以奕立行有素必

能嗣尙事乃遷都督豫司冀并四州軍事安西將軍豫

州刺史假節未幾卒官贈鎮西將軍三子泉靖立泉早

有名譽歷義興太守

世說賢媛篇注曰淵字叔度奕第

二子與本傳異淵改

靖官至太常

為泉乃唐

人避諱

立字幼度

世說文學篇注

少穎悟

世說言語篇注謝車

傳曰立能清言善名理

與從兄朗俱為叔父安所器

重

世說言語篇曰晉武帝每餉山濤恆少謝太傅以安

嘗戒約子姪因曰子弟亦何豫人事而正欲使其佳諸

人莫有言者立荅曰譬如芝蘭玉樹欲使其生於庭階

耳安悅立少好佩紫羅香囊

世說假譎篇作謝還年少時好著紫羅香囊垂覆手

安患之而不欲傷其意因戲賭取即焚之

世說假譎篇作乃譎與賭

得即於此遂止及長有經國才略

世說識鑒篇注續晉陽秋曰立識局貞正

燒之

有經國之略屢辟不起後與王珣俱被桓溫辟爲掾竝禮重

之書鈔六十八晉中興書曰王珣弱冠與謝元俱辟大司馬桓公掾溫語人曰謝掾年三十必擁旌杖節王

掾當作黑頭公皆未易才也轉征西將軍桓豁司馬領南郡相監北

征諸軍事于時苻堅彊盛邊境數被侵寇朝廷求文武

良將可以鎮禦北方者安乃以立應舉文選和王著作八公山詩注晉

中興書曰時盜賊強盛侵寇無已朝議求文武良將中

可以鎮北方者衛將軍謝安曰唯兄子立可堪此任中

書郎郗超雖素與立不善聞而歎之曰安違眾舉親明

也立必不負舉才也時咸以爲不然超曰吾嘗與立共

在桓公府見其使才雖履屐閒亦得其任所以知之世說

識鑒篇曰于時朝議遣立北討人閒頗有異同之論惟

超曰是必濟事吾昔嘗與共在桓宣武府見使才皆盡

雖履屐之間亦得其任以此推之容必能立勳元功於  
既舉時人咸歎超之先覺又重其不以愛憎匿善

是徵還拜建武將軍兗州刺史領廣陵相監江北諸軍

事時苻堅遣軍圍襄陽車騎將軍桓冲禦之詔立發三

州人下

元本  
作丁

遣彭城內史何謙游軍淮泗以爲形援

苻堅

載記作將軍何謙之

襄陽既沒堅將彭超攻龍驤將軍戴遂於彭

城立率東莞太守高衡後軍將軍何謙次於泗口欲遣

閒使報遂令知救至其道無由小將田泓請行乃沒水

潛行將趣城爲賊所獲賊厚賂泓使云南軍已敗泓僞

許之既而告城中曰南軍垂至我單行來報爲賊所得

勉之遂遇害時彭超置輜重於留城立乃揚聲遣謙等

向留城超聞之還保輜重謙馳進解彭城圍晉書校文四曰據符

堅載記則戴遂率彭城之眾奔於立彭城仍為彭超所

得圍固未解也觀下文堅以毛當為徐州刺史鎮彭城

之文知當時彭超復進軍南侵堅將句難毛當自襄陽

城實已陷沒來會周家祿校勘記曰堅載記句作俱又按自襄陽來

襄陽之超圍幽州刺史田洛於三阿讀史方輿紀要二

役無難高郵州西八十里亦曰三阿三阿者鎮之南有平阿湖

又南有下阿谿也實應圖經曰胡注通鑑云三阿今寶

應軍卽其地一統志江南通志從之方輿紀要寶應縣

東六十里三阿鄉東晉置幽州於此案三阿鄉在射陽

故治近郊十里似三阿城在射陽其案實胡注寶應乃高

郵之謠一統志等誤據之耳王氏通鑑地理考釋高郵

有白馬塘塘阻三阿溪謝元破都顏俱難李孝逸破李

敬業處是也三阿一地或在寶應或在高郵其誤始於

輿地紀勝紀勝於楚州云三阿村晉謝元自廣陵西屯

三阿卽此地也今屬高郵縣又於高郵軍云東晉有三

阿圖經云卽今之北阿苻堅遣將彭超以兵萬圍幽州  
刺史田洛於三阿去廣陵百里謝元自廣陵救三阿大  
破其眾又云北阿鎮離城九十里在晉爲三阿卽謝元  
破堅將彭超之地蓋以寶應有三阿鄉故兩說並存其  
實寶應之三阿非晉有眾六萬詔征虜將軍謝石率水  
田洛駐兵之三阿也

軍次涂中右衛將軍毛安之游擊將軍河閒王曇之淮  
南太守楊廣宣城內史丘準次堂邑旣而盱眙城陷高

密內史毛藻沒

周家祿校勘記曰毛藻當照孝武紀苻堅載記作毛璩之

安之等軍

人相驚遂各散退朝廷震動立於是自廣陵西討難等

何謙解田洛圍進據白馬與賊大戰破之

讀史方輿紀要二十三

白馬湖在高郵州西南七十里廿二史攷異二十二曰  
今寶應縣西白馬湖卽晉時白馬也寶應圖經曰苻堅  
傳元率眾三萬次于白馬塘攷異以寶應白馬湖爲堅  
傳白馬塘改塘爲湖其說無據案地理通釋塘阻三阿



溪是與高郵之三阿密邇故元據之若斬其僞將都督

寶應之三阿去塘二百里元何爲據之

顏晉書校文四曰苻堅載記俱難遣其將都顏率騎逆戰於塘西立大敗之斬顏則都顏爲人名甚明此誤

督行一因復進擊又破之斬其僞將邵保超難引退立率

何謙戴遂田洛追之戰于君川復大破之十六國疆域志曰盱眙有

川君立參軍劉牢之攻破浮航及白船督護諸葛侃單父

令李都又破其運艦難等相率北走僅以身免於是罷

彭城下邳二戍詔遣殿中將軍慰勞進號冠軍加領徐

州刺史還于廣陵以功封東興縣侯及苻堅自率兵次

於項城眾號百萬而涼州之師始達咸陽蜀漢順流幽

并係至先遣苻融慕容暉張蚝苻方等至潁口梁成王

先等屯洛澗詔以立爲前鋒都督徐兗青三州揚州之  
晉陵幽州之燕國諸軍事與叔父征虜將軍石從弟輔  
國將軍瑋西中郎將桓伊龍驤將軍檀立建威將軍戴  
熙揚武將軍陶隱等距之眾凡八萬立先遣廣陵相劉  
牢之五千人直指洛澗卽斬梁成及成弟雲步騎崩潰  
爭赴淮水牢之縱兵追之生擒堅僞將梁他王顯梁悌  
慕容屈氏等收其軍實堅進屯壽陽列陣臨肥水立軍  
不得渡立使謂苻融曰君遠涉吾境而臨水爲陣是不  
欲速戰諸君稍却令將士得周旋僕與諸君緩轡而觀  
之不亦樂乎堅眾皆曰宜阻肥水莫令得上我眾彼寡

勢必萬全堅曰但却軍令得過而我以鐵騎數十萬向

水逼而殺之融亦以爲然遂麾使却陣眾因亂不能止

於是立與瑒伊等以精銳八干涉渡肥水石軍距張蚝

小退立瑒仍進決戰肥水南堅中流矢臨陣斬融堅眾

奔潰

通典曰壽春郡西十五里卽謝立破苻融之處

自相蹈藉投水死者不可

勝計肥水爲之不流餘眾棄甲宵遁聞風聲鶴唳皆以

爲王師已至艸行露宿重以飢凍死者十七八獲堅乘

輿

世說雅量篇注引謝車騎傳御覽三百九引晉中興書乘輿作僞輦

雲母車儀服器械

軍資珍寶山積

御覽三百九引晉中興書作寶器山積錦屬數萬端

牛馬驢騾駱

駝十萬餘詔遣殿中將軍慰勞進號前將軍假節固讓

不受賜錢百萬綵千匹既而安奏苻堅喪敗宜乘其釁  
會以立爲前鋒都督率冠軍將軍桓石虔徑造渦潁經  
略舊都立復率眾次于彭城遣參軍劉襲攻堅兗州刺  
史張崇於鄆城走之使劉牢之守鄆城兗州既平立患  
水道險澀糧運艱難用督護聞人夷謀堰呂梁水樹柵  
立七埭爲派擁二岸之流以利運漕御覽七十三引晉中興書堰作壅水  
經泗水注曰晉太元九年左將軍謝立子呂梁遣督護  
聞人夷用工九萬擁水立七埭  
讀史方輿紀要二十九日呂  
梁洪在徐州東南六十里  
自此公私利便又進伐青  
州故謂之青州派遣淮陵太守高素以三千人向廣固  
降堅青州刺史苻朗又進伐冀州遣龍驤將軍劉牢之

濟北太守丁匡據碭碭濟陽太守郭滿據滑臺奮武將  
軍顏雄渡河立營堅子不遣將桑據屯黎陽立命劉襲  
夜襲據走之不惶遽欲降立許之不告飢立潰不米二  
千斛周家祿校勘記又遣晉陵太守滕恬之渡河守黎  
陽三魏皆降以充青司豫平加立都督徐充青司冀幽  
并七州軍事立上疏以方平河北幽冀宜須總督司州  
懸遠應統豫州以勳封康樂縣公立請以先封東興侯  
賜兄子玩詔聽之更封玩豫寧伯廿二史攷異二十二  
郡有豫寧縣晉武帝太康元年更名而復遣寧遠將軍  
晉志不載據此則晉時固有豫寧矣吞演伐申凱於魏郡破之立欲令豫州刺史朱序鎮梁

國立住彭城北固河上西援洛陽內藩朝廷朝議以征  
役既久宜置戍而還使立還鎮淮陰序鎮壽陽會翟遼  
據黎陽反執滕恬之又泰山太守張願舉郡叛河北騷  
動立自以處分失所上疏送節盡求解所職詔慰勞令  
且還鎮淮陰以朱序代鎮彭城立既還遇疾上疏解職  
詔書不許立又自陳既不堪攝職慮有曠廢詔又使移  
鎮東陽城立卽路於道疾篤上疏曰臣以常人才不佐  
世忽蒙殊遇不復自量遂從戎政驅馳十載不辭鳴鏑  
之險每有征事輒請爲軍鋒由恩厚忘軀甘死若生也  
冀有毫釐上報榮寵天祚大晉王威屢舉實由陛下神

武英斷無思不服亡叔臣安協贊雍熙以成天工而霧  
霧尙翳六合未朗遺黎塗炭窟巢宜除復命臣荷戈前  
驅董司戎首冀仰憑皇威宇宙寧一陛下致太平之化  
庸臣以塵露報恩然後從亡叔臣安退身東山以道養  
壽此誠以形于文旨達于聖聽矣臣所以區區家國實  
在於此不謂臣愆咎夙積罪鍾中年上延亡叔臣安亡  
兄臣靖數月之間相係殂背下逮稚子尋復天昏哀毒  
兼纏痛百常情臣不勝禍酷暴集每一慟殆斃所以含  
哀忍悲期之必存者雖哲輔傾落聖明方融伊周嗣作  
人懷自厲猶欲申臣本志隆國保家故能豁其情滯同

之無心耳去冬奉司徒道子告括囊遠圖逮問臣進止之宜臣進不達事機以蹙境爲恥退不自揆故欲順其宿心豈謂經略不振自貽斯戾是以奉送章節待罪有司孰徇常儀實有媿心而聖恩赦過黷法垂宥使抱罪之臣復得更名於所司木石猶感而況臣乎願將身不良動與鬻會謙德不著害盈是荷先疾旣動促至委篤陛下體臣疾重使還藩淮側甫欲休兵靜眾綏懷善撫兼苦自療冀日月漸瘳繕甲俟會思更奮迅而所患沈頓有增無損今者惓惓救命朝夕臣之平日率其常短加以匪懈猶不能令政理弘宣況今內外天隔永不復



接寧可卧居重任以招患慮追尋前事可爲寒心臣之  
微身復何足惜區區血誠憂國實深謹遣兼長史劉濟  
重奉送節蓋章傳伏願陛下垂天地之仁拯將絕之氣  
時遣軍司鎮慰荒雜聽臣所乞盡醫藥消息歸誠道門  
冀神祇之祐若此而不差修短命也使臣得及視息瞻  
覩墳柏以此之盡公私真無恨矣伏枕悲慨不覺流涕  
詔遣高手醫一人令自消息又使還京口療疾立奉詔  
便還

御覽一百八十劉楨京口記曰  
長村東太漬墳北有謝元故宅

病久不差又上疏

曰臣同生七人凋落相繼惟臣一己孑然獨存在生荼  
酷無如臣比所以含哀忍痛希延視息者欲報之德實

懷罔極庶蒙一瘳申其此志且臣孤遺滿目顧之惻然  
爲欲極其求生之心未能自分於灰土悽悽之情可哀  
可愍伏願陛下矜其所訴霈然垂恕不令微臣銜恨泉  
壤表寢不報前後表疏十餘上久之乃轉授散騎常侍  
左將軍會稽內史水經漸江水注曰浦陽江又東北逕  
始宜縣鱗山之成功嶠水經注刊誤  
日曹學佺云圖經稱謝立破苻堅歸越人榮之磨石時  
大書成功嶠三字深刻其上則以爲成工嶠者誤也時  
吳興太守晉宣侯張立之亦以才學顯自吏部尚書與  
立同年之郡而立之名亞於立時人稱爲南北二立論  
者美之世說言語篇曰張立之顧敷是顧和中外孫皆  
少而聰惠和並知之而常謂顧勝親重偏至張  
頗不懌于時張年九歲顧年七歲和與俱至寺中見佛  
般泥洹像弟子有泣者有不泣者和以問二孫立謂破

親故泣不被親故不泣敷曰不然當由忘情故不泣不  
能忘情故泣注引續晉陽秋曰張玄之字祖希吳郡太  
守澄之孫也少以學顯歷吏部尚書出為冠軍將軍吳  
興太守謝玄同時之郡論者以為南北之望晉書校文  
四日即謝安傳之張玄亦即謝道韞傳之張玄晉玄既  
人單名多加之字錢竹汀養新錄疑非一人失之

與疾之郡十三年卒于官時年四十六追贈車騎將軍

開府儀同三司謚曰獻武子璠嗣世說言語篇注引上

祕書郎早卒子靈運嗣鍾嶸詩品曰初錢塘杜明師夜

運生於會稽旬日而謝玄亡其家以子孫難得送於杜

治養之十五方還故名客兒南史本傳曰靈運子鳳早

卒鳳子超宗征北諮議超宗子才璠少不惠而靈運文

藻幾卿左光祿長史才卿子藻

藻豔逸立嘗稱曰我尚生璠璠那得不生靈運永熙中

為劉裕世子左衛率

文選初至郡詩注臧榮緒晉書曰靈運初為琅邪王大司馬行軍參

軍始從立征伐者何謙字恭子東海人戴遂字安丘處

士達之弟竝驍果多權略達厲操東山而遂以武勇顯

世說棲逸篇曰戴安道既厲操謝安嘗謂遂曰卿兄弟

志業何殊遂曰下官不堪其憂家兄不改其樂

家兄作家弟蓋以達為遂遂以軍功封廣信侯

弟與本傳以遂為達弟異戴氏譜曰遂有功封廣信侯案廣信疑當作廣陵位至大司農

萬字萬石才器雋秀

安書鈔四十一御覽六百二十七晉中興而善自衒曜

故早有時譽工言論善屬文

成殊敘漁父屈原季主賈誼楚老龔勝孫登嵇康四隱

四顯爲八賢論其旨以處者爲優出者爲劣以示孫綽

綽與往反以體公識遠者則出處同歸

世說文學篇曰謝萬作八賢論

與孫興公往反小有利鈍謝後出以示顧君齊顧曰嘗

我亦作知卿當無所名注引中興書體公作體立

與蔡系送客於征虜亭與系爭言系推萬落牀冠帽傾

脫萬徐拂衣就席神意自若坐定謂系曰卿幾壞我面

世說雅量篇曰支

系曰本不爲卿面計然俱不以介意

送於征虜亭蔡子叔前至坐近林公謝萬石後來坐小

遠蔡暫起謝移就其處蔡還見謝在焉因合褥舉謝擲

地自復坐謝冠幘傾脫乃徐起振衣就席神意甚平不

覺瞋沮坐定謂蔡曰卿奇人殆壞我面蔡答曰我本不

爲卿面作計其後二人俱不介意注丹陽記曰太安中

征虜將軍謝安立此亭因以爲名讀史方輿紀要二十

日征虜亭在石頭塢金陵記京師有三亭新亭冶亭征

虜亭也胡氏曰征虜亭在方山南自元武湖頭大路東

出至征虜亭時亦以此稱之弱冠辟司徒掾遷右西屬不就

簡文帝作相聞其名召爲撫軍從事中郎萬著白綸巾

鶴氅裘履版而前既見與帝共談移日書鈔九十八俗說云謝萬與太

傅共詣簡文萬無衣績簡文曰不須衣績既見共談移日方去案此說與本傳微異太原王述萬

之妻父也世說簡傲篇注謝氏譜曰萬娶太原王述女名荃爲揚州刺史萬嘗

衣白綸巾乘平肩輿徑至聽事前謂述曰人言君侯癡

君侯信自癡述曰非無此論但晚合耳世說簡傲篇信作性晚合作晚

令注引述別傳曰述少眞獨退靜人未嘗知故有晚令之言萬再遷豫州刺史領淮

南太守御覽七百一引俗說謝萬作吳興郡其兄安時隨至郡中案本傳不言爲吳興郡蓋史文闕略

也監司豫冀并四州軍事假節王羲之與桓溫箋曰謝

萬才流經通處廊廟參諷議故是後來一器而今屈其  
邁往之氣以俯順荒餘近是違才易務矣溫不從萬既  
受任北征矜豪傲物嘗以嘯詠自高未嘗撫眾兄安深  
憂之世說簡傲篇曰未嘗撫慰眾士謝公甚器愛萬而審其必敗乃俱行自隊主將帥已  
下安無不慰勉世說簡傲篇曰謝公欲深著恩信自隊主將帥以下無不身造厚相遜謝及萬  
事敗軍中因欲除之復云當爲隱士故幸得而免謂萬曰汝爲元帥諸將宜數  
接對以悅其心世說簡傲篇作宜數喚諸將宴會以悅眾心豈有傲誕若斯  
而能濟事也萬乃召集諸將都無所說直以如意指四  
坐云諸將皆勁卒諸將益恨之既而先遣征虜將軍劉  
建修治馬頭城池自率眾入渦潁以援洛陽世說品藻篇注中興

書曰萬之爲豫州氏羌暴掠司豫鮮卑屯結并冀萬既受方任自率眾入潁以援洛陽東晉疆域志曰元和志渴水在譙縣西四十八里按北中郎將郗曇以疾病退萬此時或又自淮入渴潁也

還彭城萬以爲賊盛致退便引軍還眾遂潰散世說品藻篇曰

謝萬壽春敗後簡文問郗超萬自可敗那得乃狼狽單爾失士卒情超曰伊以率任之性欲區別智勇

歸廢爲庶人後復以爲散騎常侍書鈔五十八晉起居注曰升平五年詔曰

前西中郎將謝萬字石才義簡亮宜居獻替其以爲散騎常侍案本傳失載爲中郎將字石二字非詔文乃

書鈔者所增入石會卒時年四十二因以爲贈子韶字字上又脫去萬字

穆度少有名時謝氏允彥秀者稱封胡羯末封謂韶胡謂朗羯謂玄末謂川皆其小字也世說賢媛篇作封胡

小字遏末謝淵小字或曰封謂朗遏謂玄末謂韶胡謂淵案謝奕傳下淵避諱改泉此又改作川乃史臣失檢



處韶朗川竝早卒惟立以功名終韶至車騎司馬隋志梁有

車騎將軍謝韶集三卷亡案韶既韶子恩字景伯宏達

早卒恐未至將軍當為司馬之謫韶子恩字景伯宏達

有遠略韶為黃門郎武昌太守周家祿校勘記曰恩三

子曜弘微皆歷顯位南史謝弘微傳曰曜歷御史中丞

贈太常密子莊字希逸中書令散騎常侍莊子颺肅

從淪颺晉平太守肅字敬沖中書監司徒衛將軍肅子

諲右光祿大夫諲子哲字穎豫司徒左長史顯字仁悠

北中郎長史淪字義潔太子詹事淪子覽舉覽字景滌

吳興太守舉字言揚尚書令舉子叔子含茂

都官尚書叔子儼儼太常卿仙尚書僕射

朗字長度父據早卒世說言語篇注曰朗字長度安次兄

據之長子紕漏篇注曰虎子據小字據字立道尚書襄

弟景仁左僕射子恂鄱陽太守恂子穉西陽太守景仁

弟純字景懋衛軍長史南平相純孫沈山陰令純弟述

字景先吳興太守述子綜約緯綜太子中舍人緯正員郎中周家祿校勘記曰此傳宜在石後按目錄石兄子朗弟子邈相連爲文後人朗善言玄理世說文學篇注以萬傳有朗誤次萬後

涉有逸才文義豔發名亞於玄總角時病新起體甚羸善言玄理

未堪勞於叔父安前與沙門支遁講論遂至相苦其母

王氏世說文學篇曰母王夫人在壁後聽之注再遣信

令還安欲留使竟論王氏因出云新婦少遭艱難一生

所寄惟在此兒遂流涕攜朗去安謂坐客曰家嫂辭情

慷慨世說文學篇此句下恨不使朝士見之朗終於東

陽太守子重字景重明秀有才名爲會稽王道子驃駘

長史嘗因侍坐于時月夜明淨道子歎以爲佳御覽四

竊曰謝太傅庭中夜坐月色無玷歎以爲佳世說言語  
篇作司馬太傅齋中夜坐于時天月明淨都無纖翳案  
御覽所引晉書作謝太傅與本傳異重率爾曰意謂乃不如微雲點綴道  
子因戲重曰案御覽四引晉書解籍卿居心不淨乃復  
强欲滓穢太清邪子綯字宣映南史謝晦傳曰重生綯  
帝鎮軍長史瞻字宣遠豫章太守晦字宣明領護南蠻  
校尉荊州刺史加都督子世休瞻字宣鏡黃門侍郎子  
世平案宋書謝晦傳世休祕書郎綯子世基又有瞻曾  
兄子著作佐郎紹遜兄子世猷均不詳何人之子  
於公坐戲調無禮於其舅袁湛湛甚不堪之謂曰汝父  
昔已輕舅汝今復來加我可謂世無渭陽情也綯父重  
卽王胡之外孫與舅亦有不協之論湛故有此及云  
石字石奴初拜祕書郎累遷尙書僕射征句難亦作俱  
難見上

文以勳封興平縣伯淮肥之役詔石解僕射以將軍假  
節征討大都督與兄子玄珍破苻堅先是童謠云誰謂  
爾堅石打破故桓豁皆以石名子以邀功焉堅之敗也  
雖功始牢之而成于玄珍然石時實爲都督焉遷中軍  
將軍尙書令更封南康郡公于時學校陵遲石上疏請  
興復國學以訓胄子班下州郡普修鄉校疏奏孝武帝  
納焉宋書禮志一引太元九年石興復國學疏文繁不  
備錄通典五十三曰明年選公卿二千石子弟生  
增造廟房屋百五十五間而品課無章君子恥與其列  
國子祭酒殷茂上言臣聞舊制國學生皆取冠族華胄  
比列皇儲而中混雜蘭艾遂令兄安薨石遷衛將軍加  
人情恥之詔雖褒納竟不施行散騎常侍以公事與吏部郎王恭互相短長恭甚忿恨

自陳福阨不允且疾源深固乞還私門石亦上疏遜位

書鈔五十九晉中興書曰謝石上疏遜位曰尚書令國

之冢宰總括百揆憲範王猷式造羣辟故必簡德而授

量才而有司奏石輒去職免官詔曰石以疾求退

定也 書鈔五十九

九晉中興書曰石表 豈準之常制其喻令還歲餘不起

以脚疾不敢朝拜

表十餘上帝不許石乞依故尚書令王彪之例於府綜

攝詔聽之疾篤進位開府儀同三司加鼓吹未拜卒時

年六十二石少患面創療之莫愈乃自匿夜有物來舐

其瘡隨舐隨差舐處甚白

御覽三百六十五異苑曰乃

自幽遠止於巖下中宵有物

來舐其創隨舐隨除既不見

形竟爲是龍而舐處悉白

故世呼爲謝白面石在職

務存文刻既無他才望直以宰相弟兼有大勳遂居清

顯而聚斂無厭取譏當世

御覽四百九十二晉中興追書曰妄自夸擬曾無慙德

贈司空禮官議謚博士范弘之議謚曰襄墨公語在弘之傳朝議不從單謚曰襄子汪嗣早卒汪從兄沖以子明慧嗣爲孫恩所害明慧從兄喻復以子嵩嗣宋受禪國除

邈字茂度父鐵永嘉太守邈性剛愎無所屈撓頗有理識累遷侍中時孝武帝觴樂之後多賜侍臣文詔辭義有不雅者邈輒焚毀之其他侍臣被詔者或宣揚之故論者以此多邈後爲吳興太守孫恩之亂爲賊胡桀郗騭等所執害之賊逼令北面邈厲聲曰我不得罪天子

何北面之有遂害之邈妻郝氏甚妬邈先娶妾郝氏怨  
懟與邈書告絕邈以其書非婦人詞疑其門下生仇玄  
達爲之作遂斥玄達玄達怒遂投孫恩并害邈兄弟竟  
至滅門

史臣曰建元之後時政多虞巨猾陸梁權臣橫恣其有  
兼將相於中外系存亡於社稷負展資之以端拱鑿井  
賴之以晏安者其惟謝氏乎簡侯任總中臺效彰分閭  
正議云唱喪禮墮而復弘遺音旣補雅樂缺而還備君  
子哉斯人也文靖始居塵外高謝人閒嘯詠山林浮元  
作游泛江海當此之時蕭然有陵霞之致暨于褫薜蘿而

襲朱組去衡泌而踐丹墀庶績於是用康彝倫以之載  
穆苻堅百萬之眾已瞰吳江桓溫九五之心將移晉鼎  
衣冠易慮遠邇崩心從容而杜姦謀宴衍而清羣寇宸  
居獲太山之固惟揚去果卵之危斯爲盛矣然激繁會  
於莽服之辰敦一歡於百金之費廢禮於媮薄之俗崇  
侈於耕戰之秋雖欲混哀樂而同歸齊奢儉於一致而  
不知積風已扇雅道日淪國之儀刑豈期若是珍稱貞  
幹卒以忠勇垂名混曰風流竟以文詞獲譽竝階時宰  
無墮家風奕萬以放肆爲高石奴以褊濁興累雖粵微  
類猶稱名實康樂才兼文武志存匡濟淮肥之役勅寇



望之而土崩渦潁之師中州應之而席卷方欲西平鞏  
洛北定幽燕廟算有遺良圖不果降齡何促功敗垂成  
拊其遺文經綸遠矣

贊曰安西英爽才兼辯博宣力方鎮流聲臺閣太保沈  
浮曠若虛舟任高百辟情惟一丘珍邈忠壯奕萬虛放  
爲龍爲光或卿或將偉哉獻武功宣授斧克剪凶渠幾  
清中寓

晉書謝注卷八十

錢塘吳士鑑

烏程劉承幹

同注

列傳第五十

王羲之

子玄之

凝之

徽之

徽之子楨之

周家

祿校勘記曰案傳玄之凝之不別爲篇日宜刪

王羲之字逸少司徒導之從子也祖正尚書郎父曠淮

南太守元帝之過江也曠首創其議

御覽一百八十四語林曰大將軍丞

相諸人在此時閉戶共爲謀身之計王曠世宏來在戶外諸人不客之曠乃剔壁闕之曰天下大亂諸君欲何所圖謀將欲告官遽而義之幼訥於言人未之奇輕詆

內之遂建江左之策

篇曰王右軍少時甚澀訥在大將軍許王庾二公後來  
右軍便起欲去大將軍留之曰爾家司空元規復何所  
難御覽七百三十九語林曰右軍少嘗患癩一二年  
輒發動又八百六十王隱晉書曰義之幼有風操

十三嘗謁周顗顗察而異之時重牛心炙坐客未噉顗

先割啗義之於是始知名及長辯瞻世說言語篇注文

拔爲叔父以骨鯁稱尤善隸書爲古今之冠顏氏家訓

王逸少風流才士蕭散名人舉世惟知其書翻以能自

蔽也太平廣記二百七羊欣筆陣圖曰王羲之七歲善

書二十見前代筆說於其父枕中竊而讀之父曰爾何

來竊吾所祕義之笑而不答母曰爾看用筆法父見其

小恐不能祕之語義之曰待爾成人吾授也義之拜請  
今而用之使待成人恐蔽見之幼令也父喜遂與之不  
盈其月書便大進衛夫人見語太常王策曰此兒必見  
用筆訣近見其書便有老成之智涕流曰此子必蔽吾  
名藝概曰或疑義之未分隸其實自唐以前皆稱楷  
字爲隸如東魏大覺寺碑題曰隸書是也郭忠恕曰八

分破而隸書出此語可引作義之傳注論者稱其筆勢以爲飄若浮雲矯

若驚龍

世說容止篇浮作游

深爲從伯敦導所器重時陳留阮裕

有重名爲敦主簿敦嘗謂義之曰汝是吾家佳子弟當

不減阮主簿裕亦目義之與王承王悅爲王氏三少時

太尉郗鑒使門生求女壻於導導令就東廂徧觀子弟

世說雅量篇作丞相語郗信君往東廂任意選之御覽八百六十王隱晉書曰郗虞卿聞王氏諸子皆俊令使

選壻諸子皆門生歸謂鑒曰王氏諸少並佳然聞信至

咸自矜持惟一人在東牀坦腹食獨若不聞世說雅量篇食作卧

御覽八百六十王隱晉書曰義之鑒曰正此佳壻邪世說

雅量篇作訪之乃義之也遂以女妻之世說雅量篇注

正此好

王氏譜曰義之

王氏譜曰義之

妻太傅郗鑒女名璿字子房御覽七百四  
十九書斷曰晉王逸少妻郗氏甚工書  
起家祕書郎

征西將軍庾亮請爲參軍累遷長史亮臨薨上疏稱義

之清貴有鑒裁遷宜遠將軍江州刺史裴字記一百十

云王羲之嘗爲臨川內史置宅于郡城東高坡名曰新

城旁臨迴溪特據層阜其地爽塏山川如畫今舊井及

墨池尙存每重陽日郡守從事多游于斯因立亭曰茱

萸亭案右軍未爲臨川內史此荀氏之誤郡城置宅或

在爲刺義之既少有美譽朝廷公卿皆愛其才器書鈔

史時耳九晉中興書瑯邪王錄曰弱冠知名稱道德之器世說

賞譽篇下注文章志曰義之高爽有風氣不類常流又

曰殷中軍道右軍清鑒貴要注頻召爲侍中吏部尙書

晉安帝紀曰義之風骨清舉

皆不就復授護軍將軍又推遷不拜揚州刺史殷浩素

雅重之世說賞譽篇下曰殷中軍道王右軍云勸使應

逸少清貴人吾於之甚至一時無所後

命乃遺羲之書曰悠悠者以足下出處足觀政之隆替如吾等亦謂爲然至如足下出處正與隆替對豈可以一世之存亡必從足下從容之適幸徐求衆心卿不時起復可以求美政不若豁然開懷當知萬物之情也羲之遂報書曰吾素自無廊廟忘直王丞相時果欲內吾誓不許之手跡猶存由來尙矣不於足下參政而方進退自兒娶女嫁便懷尙子平之志數與親知言之非一日也若蒙驅使關隴巴蜀皆所不辭吾雖無專對之能直謹守時命宣國家威德故當不同於凡使必令遠近咸知朝廷留心於無外此所益殊不同居護軍也漢末使

太傅馬日磾慰撫關東若不以吾輕微無所爲疑宜及

初冬以行吾惟恭以待命義之既拜護軍

御覽二百四

軍教曰今所在要在於公役公平請賜

苦暢吾乃心其有老落驚癘不堪從役或有飢又苦求

宣城郡不許乃以爲右軍將軍

惜抱軒筆記曰王羲之

右軍將軍致王方慶進右軍帖所題銜亦襲會稽內史

其誤而樂毅論後僞褚跋之誤又不足論矣

時殷浩與桓溫不協義之以國家之安在於內外和因

以與浩書以戒之

周家祿校勘記浩不從及浩將北伐

義之以爲必敗以書止之言甚切至浩遂行果爲姚襄

所敗復圖再舉又遺浩書曰知安西敗喪公私惋怛不

能須臾去懷以區區江左所營綜如此天下寒心固以  
久矣而加之敗喪此可熟念往事豈復可追願思弘將  
來令天下寄命有所自隆中興之業政以道勝寬和爲  
本力爭武功作非所當因循所長以固大業想識其由  
來也自寇亂以來處內外之任者未有深謀遠慮括囊  
至計而疲竭根本各從所志竟無一功可論一事可記  
忠言嘉謀棄而莫用遂令天下將有土崩之勢何能不  
痛心悲慨也任其事者豈得辭四海之責追咎往事亦  
何所復及宜更虛己求賢當與有識共之不可復令忠  
允之言常屈於當權今軍破於外資竭於內保淮之志



非復所及莫過還保長江都督將各復舊鎮自長江以外羈縻而已任國鈞者引咎責躬深自貶降以謝百姓更與朝賢思布平政除其煩苛省其賦役與百姓更始庶可以允塞羣望救倒懸之急使君起於布衣任天下之重尙德之舉未能事事允稱當董統之任而敗喪至此恐闔朝羣賢未有與人分其謗者今亟修德補闕廣延羣賢與之分任尙未知獲濟所期若猶以前事爲未工故復求之於分外宇宙雖廣自容何所知言不必用或取怨執政然當情慨所在正自不能不盡懷極言若必親征未達此旨果行者愚智所不解也願復與眾共

之復被州符增運千石徵役兼至皆以軍期對之喪氣  
罔知所厝自頃年割剝遺黎刑徒竟路殆同秦政惟未  
加參夷之刑耳恐勝廣之憂無復日矣又與會稽王牋  
陳浩不宜北伐并論時事曰古人恥其君不爲堯舜北  
面之道豈不願尊其所事比隆往代況遇千載一時之  
運顧智力屈於當年何得不權輕重而處之也今雖有  
可欣之會內求諸己而所憂乃重於所欣傳云自非聖  
人外盜必有內憂今外不盜內憂已深古之弘大業者  
或不謀於眾傾國以濟一時功者亦往往而有之誠獨  
運之明足以適眾斲勞之弊終獲永逸者可也求之於

今可得擬議乎夫廟算決勝必宜審量彼我萬全而後動功就之日便當因其眾而卽其實今功未可期而遺黎殲盡萬不餘一且千里饋糧自古爲難況今轉運供繼西輸許洛北入黃河雖秦政之弊未至於此而十室之憂便以交至今運無還期徵求日重以區區吳越經緯天下十分之九不亡何待而不度德量力不弊不已此封內所痛心歎悼而莫敢吐誠往者不可諫來者猶可追願殿下更垂三思解而更張令殷浩苟羨還據合肥廣陵許昌譙郡梁彭城諸軍皆還保淮爲不可勝之基須根立勢舉謀之未晚此實當今策之上者若不行

此社稷之憂可計日而待安危之機易於反掌考之虛實著於目前願通獨斷之明定之於一朝也地淺而言深豈不知其未易然古人處閭閻行陣之間尙或干時謀國評裁者不以爲譏況廟大臣末行豈可默而不言哉存亡所係決在行之不可復持疑後機不定之於此後欲悔之亦無及也殿下德冠宇內以公室輔朝最可直道行之致隆當年而未允物望受殊遇者所以寤寐長歎實爲殿下惜之國家之慮深矣常恐伍員之憂不獨在昔麋鹿之游將不止林藪而已願殿下整廢虛遠之懷以救倒懸之急可謂以亡爲存轉禍爲福則宗廟

之慶四海有賴矣時東土饑荒義之輒開倉振貸然朝廷賦役繁重吳會尤甚義之每上疏爭之事多見從又

遺尚書僕射謝安書曰

惜抱軒筆記曰逸少在會稽謝安尚爲處士未出也此必是與

謝尚仁祖書此或由雕木字誤諸史拾遺曰義之任會稽內史日謝安未爲僕射當是謝尚之謗據尚傳永和

中拜尚書僕射

出爲都督豫州刺史鎮歷陽在任有政績上表求入朝因留京師署僕射事義之與尚書蓋在

入朝署僕射事時也

頃所陳論每蒙允納所以令下小得蘇息各

安其業若不耳此一郡久以蹈東海矣今事之大者未

布漕運

元作運漕

是也吾意望朝廷可申下定期委之所司

勿復催下但當歲終考其殿最長吏尤殿命檻車送詣天臺三縣不舉二千石必免或可左降令在疆塞極難

之地又自吾到此從事常有四五兼以臺司及都水御史行臺文符如雨倒錯違背不復可知吾又瞑目循常推前取重者及綱紀輕者在五曹主者蒞事未嘗得十日吏民趨走功費萬計卿方任其重可徐尋所言江左平日揚州一良刺史便足統之況以羣才而更不理正由爲法不一牽制者眾思簡而易從便足以保守成業倉督監耗盜官米動以萬計吾謂誅翦一人其後便斷而時意不同近檢校諸縣無不皆爾餘姚近十萬斛重斂以資姦吏令國用空乏良可歎也自軍興以來征役及充運死亡叛散不反者眾虛耗至此而補代循常所

在凋困莫知所出上命所差上道多叛則吏及叛者席  
卷同去又有常制輒令其家及同伍課捕課捕不擒家  
及同伍尋復亡叛百姓流亡戶口日減其源在此又有  
百工醫寺死亡絕沒家戶空盡差代無所上命不絕事  
起或十年十五年彈舉獲罪無懈怠而無益實事何以  
堪之謂自今諸死罪原輕者及五歲刑可以充此其減  
死者可長充兵役五歲者可充雜工醫寺皆令移其家  
以實都邑都邑旣實是政之本又可絕其亡叛不移其  
家逃亡之患復如初耳今除罪而充雜役盡移其家小  
人愚迷或以爲重於殺戮可以絕姦刑名雖輕懲肅實

重豈非適時之宜邪羲之雅好服食養性不樂在京師  
初渡浙江便有終焉之志會稽有佳山水名士多居之  
謝安未仕時亦居焉孫綽李充許詢支遁等御覽一百九十四引  
王隱晉書作孫綽許詢謝尚支遁等又二百皆以文義  
三十八引晉中興書作與謝安孫綽等游處  
冠世並築室東土與羲之同好嘗與同志宴集於會稽  
山陰之蘭亭羲之自爲之序以申其志世說言語篇注  
邑在山陰故名焉會稽郡記曰會稽境特多名山水企  
羨篇注引王羲之臨河敘蓋右軍初成此序自名臨河  
至後人始稱爲蘭亭序也水經漸江水注曰浙江又東  
與蘭溪合注云湖口有亭號曰蘭亭亦曰蘭上里王羲  
之謝安兄弟數往造焉太守王廙之移亭水中何無忌  
臨郡更起亭于山椒御覽七百四十八何延之蘭亭記  
曰蘭亭者晉右軍會稽內史瑯琊王羲之字逸少所書  
之詩序也右軍蟬聯美胄蕭散名賢雅好山水尤善草



隸以晉穆帝永和九年暮春三月三日嘗游山陰與太  
原孫綽綽興公廣漢王彬之并逸少凝徽操之等四十有  
一  
人  
棣  
理  
歲  
硯  
硯  
鵞  
詠  
臨  
柯  
敘  
也  
而  
計  
賦  
賦  
辯  
都  
惟  
用  
蠶  
繭  
紙  
鼠  
鬚  
筆  
道  
媚  
勁  
健  
絕  
代  
更  
無  
凡  
二  
十  
八  
行  
三  
百  
二  
十  
四  
字  
有  
重  
者  
皆  
搆  
別  
體  
就  
中  
之  
字  
最  
多  
凡  
有  
二  
十  
許  
箇  
變  
轉  
悉  
異  
遂  
無  
同  
者  
其  
時  
乃  
有  
神  
助  
及  
醒  
後  
他  
日  
更  
書  
數  
百  
十  
本  
終  
無  
如  
被  
禊  
所  
書  
之  
者  
右  
軍  
亦  
自  
珍  
愛  
寶  
重  
此  
書  
留  
付  
子  
孫  
傳  
掌  
至  
七  
代  
孫  
智  
永  
承  
即  
右  
軍  
第  
五  
子  
徽  
之  
之  
後  
掌  
其  
書  
爲  
蕭  
翼  
給  
而  
取  
之  
張  
湜  
雲  
谷  
雜  
記  
曰  
王  
羲  
之  
與  
羣  
賢  
會  
于  
山  
陰  
之  
蘭  
亭  
各  
賦  
詩  
義  
之  
爲  
序  
自  
晉  
至  
唐  
皆  
謂  
之  
蘭  
亭  
序  
近  
世  
輒  
曰  
爲  
蘭  
亭  
記  
非  
也  
遜  
齋  
閒  
覽  
云  
蘭  
亭  
記  
其  
文  
甚  
麗  
但  
天  
朗  
氣  
清  
春  
言  
秋  
景  
以  
此  
不  
入  
選  
韓  
子  
蒼  
云  
蘭  
亭  
記  
蕭  
統  
不  
取  
以  
序  
爲  
記  
皆  
承  
襲  
謬  
誤  
之  
過  
也  
寰  
宇  
記  
九  
十  
六  
日  
蘭  
亭  
在  
山  
陰  
縣  
西  
南  
二  
十  
七  
里  
輿  
地  
志  
山  
陰  
郭  
西  
有  
蘭  
渚  
渚  
有  
蘭  
亭  
王  
羲  
之  
所  
謂  
曲  
曰  
永  
和  
九  
年  
歲  
在  
癸  
丑  
暮  
春  
之  
初  
水  
之  
勝  
境  
製  
序  
于  
此  
世  
說  
企  
羨  
篇  
注  
引  
王  
羲  
會  
于  
會稽山陰之蘭亭脩禊事

也羣賢畢至少長咸集此地有崇山峻嶺茂林脩竹又有清流激湍映帶左右引以爲流觴曲水列坐其次雖無絲竹管絃之盛一觴一詠亦足以暢敘幽情是日也天朗氣清惠風和暢仰觀宇宙之大俯察品類之盛所以游目騁懷世說企羨篇注引臨河敘游目作娛目足以極視聽之娛信可樂也世說企羨篇注引臨河敘作信可樂人類聚四引作信足樂也夫人之相與俯仰一世或取諸懷抱晤言一室之內或因寄所託放浪形骸之外雖趣舍萬殊靜躁不同當其欣於所遇暫得於己快然自足不知老之將至及其所之旣倦情隨事遷感慨係之矣向之所欣俛仰之間已爲陳跡猶不能

不以之興懷況脩短隨化終期於盡古人云死生亦大  
矣豈不痛哉每覽昔人興感之由若合一契未嘗不臨  
文嗟悼不能喻之於懷固知一死生爲虛誕齊彭殤爲  
妄作後之視今亦猶今之視昔悲夫故列敘時人錄其  
所述世說企羨篇注引臨河敘曰右將軍司馬太原孫承公等二十六人賦詩如左前餘姚令會稽謝勝  
鏐俗鍾觀等十五人不能賦詩罰酒各三斗雲谷雜記曰予嘗得蘭亭石刻一卷首列羲之序文次則諸人  
之詩末有孫綽後序其詩四言二十二首五言二十六首自羲之而下凡四十有二人成兩篇者十一人右將  
軍王羲之瑯邪王友謝安司徒左西屬謝萬左司馬孫綽行參軍徐豐之前餘杭令孫統前永興令王彬之王  
凝之王肅之嫁甥鄒石王徽之陳郡袁嶠之成一篇者一十五人散騎常侍鄒曇行參軍王豐之前上虞令華  
茂穎川庾友鎮軍司馬虞說郡功曹魏滂郡五官謝繹穎川庾蘊行參軍曹茂之徐州西平曹華滎陽柏偉縣

謝安詩不成各罰酒三觥侍郎謝琨鎮國大將軍掾卞  
六人詩不成各罰酒三觥侍郎謝琨鎮國大將軍掾卞  
迪行參軍事丘旄王獻之行參軍楊模參軍孔斌陳  
綽作參軍劉密山陰令虞谷府功曹勞夷府主簿后綿  
前長岑令華者府主簿任疑前餘杭令謝藤任城呂系  
任城呂本彭城曹謹諸詩及後序文多不載姑記作者  
姓名于此庶覽者知當雖世殊事異所以興懷其致一  
世一觴一詠之樂云

也後之覽者亦將有感於斯文或以潘岳金谷詩序方  
其文義之比於石崇聞而甚喜性愛鵝會稽有孤居姥  
養一鵝善鳴求市未能得遂攜親友命駕就觀姥聞義  
之將至烹以待之義之歎惜彌日又山陰有一道士養  
好鵝義之往觀焉意甚悅固求市之道士云爲寫道德  
經當舉羣相贈耳義之欣然寫畢籠鵝而歸甚以爲樂

其任率如此嘗詣門生家見槩几滑淨因書之

太平廣記二百

七圖書會粹曰羲之性好鵝山陰曇礪村有一道士養好者十餘王清旦乘小船故往看之意大願樂乃告求市易道士不與百方譬說不能得之道士言性好道久欲寫河上公老子縑素早辦而無人能書府君若能自書屈道德各兩章便合羣以奉羲之停半日為寫畢籠鵝而歸大以為樂又嘗詣一門生家設佳饌供給意甚感之欲以書相報見有一真艸相半後為其父誤刮去新樵儿至滑淨王便書之

之門生驚悞者累日又嘗在蕺山見一老姥持六角竹

扇賣之羲之書其扇各為五字姥初有愠色因為姥曰

但言是王右軍書以求百錢邪姥如其言人競買之

初學

記二十五沈約晉書曰王羲之在會稽山見一老姥持十許六角竹扇羲之因書扇各作五字語姥曰道是王右軍書字索百錢大平廣記二百七圖書會粹曰旦見一老姥把十許六角竹扇出市王聊問比欲貨耶一枚

幾錢答云二十許右軍取筆書扇五字姥大悵惋云老  
舉家朝餚俱仰於此云何書壞王答曰無所損但道是  
王右軍書字請一百他日姥又持扇來羲之笑而不荅  
既入市人競市之其書爲世所重皆此類也每自稱我書比鍾繇當抗行  
比張芝艸猶當雁行也張彥遠法書要錄一引作比之  
鍾張當抗行或謂過之御覽七  
百四十八梁武帝觀鍾繇書法曰子敬不逮逸少逸少  
不逮元常又張懷瓘議書曰其真書逸少第一元常第  
二其行書逸少第一子敬第二元常第三伯瑛第四又  
書斷曰鍾繇字元常尤善書師曹喜蔡邕劉德昇真書  
尤妙乃過於師秦漢以來一人而已其行書羲之之亞  
篆書則索術之下八分則有魏受禪碑稱此爲最也  
曾與人書云張芝臨池學書池水盡黑使人耽之若是  
類聚九引使未必後之也羲之書初不勝庾翼郗愔及  
人作寡人其暮年方妙嘗以章艸答庾亮而翼深歎伏因與羲之

書云吾昔有伯英章艸十紙過江顛狽遂乃亡失常歎  
妙迹永絕忽見足下荅家兄書煥若神明頓還舊觀時  
驃騎將軍王述少有名譽與羲之齊名而羲之甚輕之  
世說仇璠篇曰王右軍素輕藍田藍田晚節論譽轉  
重注中興書曰羲之與述趣向不同而兩不相協由

是情好不協述先爲會稽以母喪居郡境羲之代述止

一弔遂不重詣

世說仇璠篇作右軍代爲郡屢言出弔連日不果後詣門自通主人既哭不前

而去以

述每聞角聲謂羲之當候已輒洒掃而待之如

陵辱之此者累年而羲之竟不顧述深以爲恨及述爲揚州刺  
史將就徵周行郡界而不過羲之臨發一別而去先是  
羲之常謂賓友曰懷祖正當作尙書耳投老可得僕射

更求會稽便自邈然及述蒙顯授義之恥爲之下遣使

詣朝廷求分會稽爲越州行人失辭

世說仇璩篇作使人受意失旨大

爲時賢所笑旣而內懷愧歎謂其諸子曰吾不減懷祖

而位遇懸邈當由汝等不及坦之故邪述後檢察會稽

郡辯其刑政主者疲於簡對義之深恥之遂稱病去郡

世說仇璩篇曰後藍田臨揚州右軍尚在郡藍田密令從事數其郡諸不法以先有璩令自爲其宜右軍遂稱

疾去郡注引中興書曰檢校會稽郡求其得失主者疲於課對於父母墓前自誓曰維

永和十一年三月癸卯朔九日辛亥

御覽四百八十引晉中興書誤作二

月太平廣記二百九國史異纂曰王羲之告誓文今之所傳卽其藁本不具年月日朔其真本維永和十一年三月癸卯九日辛亥而書亦真開元初潤州江寧縣瓦棺寺修講堂匠人於鴟吻內竹筒中得之與一沙門



至八年縣丞李延業求得上岐王王以獻上留內不出  
或云其後却借岐王十二年王家失火圖書悉為灰燼  
此書亦小子義之敢告二尊之靈義之不天夙遭閔凶  
見焚矣

不蒙過庭之訓

御覽四百八十引晉中興書不蒙作不遂

母兄鞠育得漸庶

幾

廿二史攷異十七曰張昭傳凡在庶幾之流無不造門王弼以庶幾為慕聖何晏解論語亦云庶幾聖道

王充論衡云孔子之門講習五經五經皆習庶幾之才也顧邵傳自州郡庶幾及四方人士往來相見蓋魏晉

人好用庶幾字

遂因人乏

御覽四百八十引晉中興書作遂因人之力

蒙國寵榮進

無忠孝之節退違推賢之義

御覽四百八十引晉中興書推賢作賢量

每仰

詠老氏周任之誠常恐斯亡無日憂及宗祀豈在微身

而已是用寤寐永歎若墜深谷止足之分定之於今謹

以今月吉辰肆筵設席稽顙歸誠告誓先靈自今之後

敢渝此心貪冒苟進是有無尊之心而不子也子而不  
子天地所不覆載名教所不得容信誓之誠有如皦日  
義之既去官與東土人士盡山水之游弋釣爲娛又與  
道士許邁共修服食採藥石不遠千里徧游東中諸郡  
窮諸名山泛滄海歎曰我卒當以樂死謝安嘗謂羲之  
曰中年以來傷於哀樂與親友別輒作數日惡羲之曰  
年在桑榆自然至此頃一作須正賴絲竹陶寫恆恐兒輩  
覺損其懽樂之趣一本無損字世說言語篇懽樂作欣樂朝廷以其誓苦  
亦不復徵之時劉惔爲丹楊尹許詢嘗就惔宿世說言語篇作  
許詢出都牀帷新麗飲食豐甘詢曰若此保全殊勝東  
就劉宿

山惔曰卿若知吉凶由人吾安得保此義之在坐曰令  
巢許遇稷契當無此言二人並有愧色初義之旣優游  
無事與吏部郎謝萬書曰古之辭世者或被髮陽狂或  
汚身穢跡可謂艱矣今僕坐而獲逸遂其宿心其爲慶  
幸豈非天賜違天不祥頃東游還脩植桑果今盛敷榮  
率諸子抱弱孫游觀其閒有一味之甘割而分之以娛  
目前雖植德無殊邈猶欲教養子孫以敦厚退讓或以  
元作輕薄庶令舉策數馬彷彿萬石之風君謂此何如  
比當與安石東游山海并行行字田少視地利頤養閑暇  
衣食之餘欲與親知時共懽譙雖不能興言高詠銜杯

引滿語田里所行故以爲撫掌之資其爲得意可勝言  
邪常依陸賈班嗣楊王孫之處世甚欲希風數子老夫  
志願盡於此也萬後爲豫州都督又遺萬書誡之曰以  
君邁往不屑之韵而俯同羣碎誠難爲意也然所謂通  
識正自當隨事行藏乃爲遠耳願君每與士之下者同  
則盡善矣食不二味居不重席此復何有而古人以爲  
美談濟否所由實在積小以致高大君其存之萬不能  
用果敗年五十九卒御覽六百六十六太平經曰王右軍病請杜恭恭謂弟子曰右軍病不差何用五十餘日果卒刻錄四日贈金紫光祿大夫  
王右軍墓在縣東孝嘉鄉五十里  
諸子遵父先旨固讓不受有七子知名者五人世說非調篇注

王氏譜曰肅之字幼恭右將軍義之第四子歷中書郎驃騎諮議隋志云梁有太子左率王肅之集三卷錄一卷亡案本傳義之諸子可攷者爲玄之疑之徵之操之獻之凡五人加以肅之尙缺一人之名法書要錄引義之與高平郗公書敘肅之於玄之疑之次所不可考者也又據世說雅量篇注引中興書御覽七百四十八引何延之蘭亭序記均云第五子徽之則操之獻之當爲第六子七子矣惟隋志云肅之官左率與王氏譜異法書要錄引義之書則云授中書郎驃騎諮議太子左率蓋諸與隋志各舉一官耳玄之早卒次疑之世說言語篇注王其先後之一官耳亦工艸隸仕歷江州刺史左將軍會稽內平右將軍義之第二子

史王氏世事張氏五斗米道疑之彌篤孫恩之攻會稽寮佐請爲之備疑之不從方入靖室請禱出語諸將佐曰吾已請大道許許字少鬼兵相助賊自破矣既不設備

遂為孫恩所害

案五斗米道郗超何充王恭殷仲堪諸傳均作天師道魏書司馬叡傳王凝之

事五斗米道恩之來也弗先遣軍乃稽顙于道室跪而

呪說指麾空中若有處分者官屬勸其討恩疑之曰我

已請大道出兵凡諸津要各有數萬人矣恩漸近乃聽

遣軍比兵出恩已至矣戰敗疑之謂民吏曰

言語篇注引晉安帝紀作疑之謂民吏曰

不須備防吾已請大道許遣鬼兵相助

徽之字子猷世說雅量篇注中興書性卓犖不羈書鈔

九晉中興書琅邪王錄為大司馬桓溫參軍蓬首散帶

曰卓犖不羈欲為倣達

不綜府事世說簡倣篇注引中興書作不綜知府事又為車騎桓沖騎兵參

軍沖問卿署何曹對曰似是馬曹又問管幾馬曰不知

馬何由知數世說簡倣篇作答曰不知何署時見牽馬

馬何由知其數又問馬比死多少曰未知生焉知死嘗從沖行

知其數

值暴雨徽之因下馬排入車中謂曰公豈得獨擅一車

書鈔一百三十九引羊堅等三十國春秋作公豈得獨擅一車不爲國士乎沖嘗謂徽之曰

卿在府日久比當相料理御覽二百四十九引徽之初

不酬荅直高視以手版柱頰云西山朝來致有爽氣耳

時吳中一士大夫家有好竹欲觀之便出坐輿造竹下

諷嘯良久主人洒埽請坐徽之不願將出主人乃閉門

徽之便以此賞之盡懽而去世說簡傲篇曰王子猷嘗

極有好竹主已知子猷當往乃灑掃施設在聽事坐相

待王肩輿徑造竹下諷嘯良久主已失望猶冀還當通

遂直欲出門主人大不堪便令左右閉門嘗寄居空宅

中便令種竹或問其故徽之但嘯詠御覽三百八十九

引語林作或問暫

佳何煩爾指竹曰何可一日無此君邪嘗居山陰世說

庸詠良久篇注中興書曰徽之任性夜雪初霽月色清朗四望皓

然獨酌酒詠左思招隱詩世說任誕篇曰夜大雪眠覺

仿佳詠左忽憶戴逵逵時在剡輿地紀勝十日剡溪在

思招隱詩人稱爲戴溪便夜乘小船詣之類聚二引語林小船作

又名雪溪舟興棹經宿方至造門不前而反人問其故徽之曰本乘

興而行興盡而反何必見安道邪雅性放誕好聲色嘗

夜與弟獻之共讀高士傳讚獻之賞并丹高絜徽之曰

未若長卿慢世也其傲達若此時人皆欽其才而穢其

行世說任誕篇注中興書曰欲爲傲達放後爲黃門侍



郎棄官東歸與獻之俱病篤時有術人

世說傷逝篇注  
幽明錄曰泰元

中有一師從遠  
來莫知所出

云人命應終而有生人樂代者則死者

可生

世說傷逝篇注引幽明錄此句下有若逼人求  
代亦復不過少時人聞此咸怪其虛誕數語

微

之謂曰吾才位不如弟

世說傷逝篇注引幽明錄  
作吾才不如弟位亦通塞請以

餘年代之術者曰代死者以己年有餘得以足亡者耳

今君與弟算俱盡何代也

世說傷逝篇注引幽明錄作  
今賢弟命既應終君侯算亦

當盡復  
何所代

未幾獻之卒徽之奔喪不哭直上靈牀坐取獻

之琴彈之久而不調歎曰嗚呼子敬人琴俱亡因頓絕

世說傷逝篇曰子敬先亡子猷問左右何以都不聞消  
息此已喪矣語時了不悲便索與來奔喪都不哭子敬

素好琴便徑入坐靈牀上取子敬琴彈弦既不  
調擲地云子敬子敬人琴俱亡因慟絕良久

先有背

疾遂潰裂月餘亦卒

世說傷逝篇注幽明錄曰子猷先有背疾子敬疾篤恆禁來往聞亡

便撫心悲惋都不得一聲背子楨之

楨之字公幹歷位侍中大司馬長史桓玄為太尉朝臣

畢集問楨之我何如君亡叔在坐咸為氣咽

世說品藻篇作桓玄

為太傅大會朝臣畢集坐裁竟問王楨之曰我何如卿第七叔于時賓客為之咽氣楨之曰亡叔

一時之標公是千載之英一坐皆悅

操之字子重歷侍中尚書豫章太守

世說品藻篇注王氏譜曰操之字子

重義之第六子歷秘書監侍中尚書豫章太守

獻之字子敬少有盛名而高邁不羈

世說品藻篇注續晉陽秋曰獻之文

義並非所長而能撮其勝會忿捐篇注劉謙之晉紀曰王獻之性甚整峻不交非類書鈔五十七楨道鸞晉陽

秋曰王獻之少而標邁不修常貫御覽雖閑居終日容  
二百四十八晉中興書作少有清譽

止不怠風流爲一時之冠年數歲嘗觀門生擣菹世說方正

篇此句下有見有勝負一語曰南風不競門生日世說方正篇作門生輩輕其小兒適

日此郎亦管中窺豹時見一斑獻之怒曰遠慙荀奉倩

近愧劉眞長遂拂衣而去嘗與兄徽之操之俱詣謝安

二兄多言俗事獻之寒溫而已既出客問安王氏兄弟

優劣安曰小者佳世說品藻篇作客問謝公向客問其

故安曰吉人之辭寡以其少言故知之世說品藻篇作吉人之辭寡躁

人之辭多嘗與徽之共在一室忽如火發徽之遽走不

推此知之世說雅量取履世說雅量獻之神色恬然徐呼左右扶出世說雅量

篇曰徐喚左右扶憑而出不夜卧齋中而有偷人入其  
異平常世以此定二王神字

室盜物都盡獻之徐曰偷兒青氈我家舊物可特置之

羣偷驚走御覽三百九十三語林曰王子敬在齋中卧

卧而不動偷遂復登厨欲有所覓子敬因呼曰偷兒青

氈是我家舊物可特置不於是羣賊始知其不眠悉置

物驚走善鈔一百三十四工艸隸善丹青法書要錄引

引青氈上有石漆二字王羲之與高

平祁公書云獻之善隸書咄咄逼人御覽七百四十八

虞緡論書曰晉時有一好事少年故作精白紗襪衣著

諸子敬子敬但取書之草正諸體悉備兩袖及襪略同

少年覺王左右有陵奪之色掣襪而走左右果逐之及

門外鬪爭分裂少年纔得一袖耳又七百四十九書斷

日獻之尤善草書幼學於父次習於張芝爾後改變制

度別矧其法率意師心冥合天理觀之逸少莫之與京

太平廣記二百七書斷曰子敬隸行草章草草飛白五體

俱入神入分入能又二百十名七八歲時學書羲之密

畫記曰草隸繼父之美妙於畫

從後掣其筆不得

太平廣記二百七引書斷密作潛不得作不脫

歎曰此兒後

當復有大名嘗書壁爲方丈大字義之甚以爲能觀者

數百人桓溫嘗使書扇筆誤落因畫作烏駝犢牛甚妙

太平廣記二百十名畫記曰又書駝牛賦於扇上此扇義熙中猶在

起家州主簿祕書郎

轉丞以選尙新安公主

御覽一百五十二晉中興書曰新安愍公主道福簡文第三女

徐淑媛所生適桓濟重適王獻之世說德行篇注獻之別傳曰咸寧中詔尙餘姚公主案咸寧蓋咸安之謄惟

餘姚與新安封號不同嘗經吳郡聞顧辟疆有名園

世說

簡傲篇注顧氏譜曰辟疆吳郡人歷郡功曹平北參軍與地紀勝五日辟疆園唐時猶在顧況嘗假居在唐爲

任晦園蓋得顧辟疆舊園先不相識乘平肩輿徑入時以爲宅也今不知其所矣

辟疆方集賓友而獻之游歷既畢

世說簡傲篇此句下有指麾好惡四字

傍若無人辟疆勃然數之曰

世說簡傲篇作

傲主人非

禮也以貴驕士非道也失是二者不足齒之傖耳便驥

出門獻之傲如也不以屑意

世說簡傲篇曰便驥其左右出門王獨在輿上回轉

顧望左右移時不至然後

謝安甚欽愛之請爲長史安

進號衛將軍復爲長史太元中新起太極殿安欲使獻

之題榜以爲萬代寶而難言之試謂曰魏時陵雲殿榜

未題而匠者誤釘之不可下乃使韋仲將懸橙書之比

訖鬚鬢盡白裁餘氣息還語子弟宜絕此法獻之揣知

其旨正色曰仲將魏之大臣寧有此事使其若此有以

知魏德之不長安遂不之逼

世說方正篇曰謝送版使王題之王有不平色語信

云可擲箸門外謝後見王曰題之上殿何若昔魏朝韋  
誕諸人亦自爲也王曰魏阼所以不長謝以爲名言注  
引宋明帝文章志陵雲殿作陵雲閣懸橙作懸梯鬚鬚  
作須髮宜絕此法作宜絕楷法正色曰下有此奇事一  
語又巧藝篇注衛恆四體書勢曰誕善楷書魏宮觀多  
誕所題明帝立陵霄觀誤先釘榜乃籠盛誕轆轤長絙  
引上使就題之去地二十五丈誕甚危懼乃戒子孫絕  
此指法著之家令藁然無所書斷曰晉韋誕字文休  
太元中孝武帝改治宮室及廟諸門並欲使王獻之隸  
書題榜獻之固辭乃使劉瓌以八分書之或又使文休  
以大篆改入分焉輟輟武庫晉韋誕有疑太元敬齋古  
今難曰魏明帝之爲人人生主中俊健者也興工造事必  
不孟浪況凌雲殿非小小營構其爲匠氏者必極天下  
之工其爲將作者亦必極當時之選樓觀題榜以人情  
度之宜必先定豈有大殿已成而使匠石輩遽掛白榜  
哉誤釘後書之說萬無此理而名書錄載之晉書又載  
之是皆好事者之過也名書錄又謂去地二十五丈以  
籠盛誕鹿盧引上書之事果可信耶晉書雖引此事而  
復著獻之語謂甯有此事則亦自不信也書法錄言高  
下異好令就點定誕因危懼以戒子孫則此說其或有

之晉書又稱誕書比訖鬚髮盡白此尤不可信者前人  
記周興嗣一夕次千文成鬚髮變白已屬繆妄而誕之  
書榜特茶頃耳危懼  
雖甚安能遽白乎  
安又問曰君書何如君家尊答曰

故當不同安曰外論不爾答曰人那得知

世說品藻篇注宋明帝文

章志曰獻之善隸書變右軍法為今體字畫秀媚妙絕  
時倫與父俱得名其章草疎弱殊不及父或訊獻之云  
羲之書勝不爾也它日見獻之問尊君書何如獻之不答  
答曰殊不爾也  
又問論者云君固當不如獻  
之笑而答曰人那得知之也  
尋除建威將軍吳興太守  
太平廣記二百七圖書會粹曰子敬為吳興羊欣父不  
疑為烏程令欣時年十五六書已有意為子敬所知往  
縣入欣齋著新白絹裙畫眠子敬乃書其徵拜中書令  
裙幅及帶欣覺歡樂遂寶之後以上朝廷  
通典二十一御覽二百二十引晉書王獻之為中書令  
啟瑯邪王為中書監表曰中書職掌詔命固非輕才所  
能獨任自晉建國嘗命宰相參領中興以來及安薨贈  
益重其在故能王言彌徽德音四塞者也



禮有同異之議惟獻之與徐邈共明安之忠勲獻之乃上  
疏曰故太傅臣安少振立風道譽洋溢弱冠遐棲則契  
齊箕皓應運釋褐而王猷允塞及至載宣威靈強猾消  
殄功勲既融投韞高讓且服事先帝眷隆布衣陛下踐  
阼陽秋尙富盡心竭智以輔聖明考其潛躍始終事情  
繾綣實大晉之雋輔義篤於曩臣矣伏惟陛下留心宗  
臣澄神於省察孝武帝遂加安殊禮未幾獻之遇疾家  
人爲上章道家法應首過問其有何得失世說德行篇作應首過問  
子敬由來有對曰不覺餘事惟憶與郝家離婚獻之前  
何異同得失御覽六百四十一引語林作無所應首惟  
妻郝曇女也遣郝家女以爲恨世說德行篇注王氏譜

日獻之娶高平郗曇世說傷逝篇注曰獻女名道茂後離婚俄而卒於官

年四安僖皇后立以后父追贈侍中特進光祿大夫太

宰書鈔五十七引劉謙之晉紀作王獻之卒贈太常案常字恐誤諡曰憲無子以兄子

靜之嗣位至義興太守南史王悅之傳祖獻之中書令父靖之司徒左長史悅之字少

明御史中丞侍中案靖之蓋由左長史出為太守宋書良吏傳作王悅無之字時議者以為義

之艸隸江左中朝莫有及者獻之骨力遠不及父而頗

有媚趣太平廣記二百七引書斷作能極小真書可謂窮微入聖筋骨緊密不減於父如大則尤直而

寡態豈可同年唯行草之間逸氣過也及桓玄雅愛其

論諸體多少右軍總而言之季孟差耳

父子書各為一表置左右以翫之法書要錄曰獻之嘗與簡文帝書十許紙題最後云下官此書甚合作願聊存之此書為桓玄所寶玄愛重二王不能釋手乃撰雜素及紙書正行之尤

美者各爲一帙。嘗置左右及南。奔雖甚狼狽。猶以自隨。將敗。並投于江。始義之所與共游。

者許邁

許邁字叔立

御覽四百十引道學傳作叔齊

一名映丹。楊句容人也。家

世士族。而邁少恬靜。不慕仕進。

鄧牧洞霄圖志曰。許邁與旌陽令遜。護軍長史

穆皆再從兄弟。御覽四百九道學傳曰。邁少與高陽許詢並治高節。同志齊名。詢能清言。兼有詞藻。邁博學。亦善屬文。太平廣記十四引十二真君傳曰。許真君名遜。字敬之。本汝南人也。祖珍。父肅。世慕至道。東晉尚書郎邁散侍護軍長史。穆皆真君之族子也。案本傳言不慕仕進。似爲尚書郎之說不足信。未弱冠嘗

造郭璞。璞爲之筮。遇泰之

其一作

上六爻。發璞謂曰。君元

吉。自天宜學。升遐之道。時南海太守鮑靚。隱跡潛遁。人

莫之知道。乃往候之。探其至要。

寰宇記九十三曰。于是乃往。師仙者鮑靚。靚後

遁跡莫知所之數年過其故人夜後門戶皆閉而聞別室有人乃視卽先生也方欲看書主人將具燭先生曰不須然披父母尙存未忍違親謂餘杭懸霤山近延陵閱如畫也

之茅山是洞庭西門潛通五嶽

寰宇記九十三日懸霤山吳興記云上有懸霤

故以爲名御覽四十一茅君內傳曰句曲山秦時名爲華陽之天三茅君居之因而爲名又茅山記有大茅山

中茅山陳安世茅季偉常所游處

御覽六百六十二神

人爲灌叔本備叔本以藥授安世後仙去案又引茅君傳曰盈字叔申父祚有三子盈固衷也渡江東治句山

季偉蓋衷之字於是立精舍於懸霤而往來茅嶺之洞室放絕

世務以尋仙館朔望時節還家定省而已父母旣終乃

遣婦孫氏還家

類聚二十九許邁別傳

遂攜其同志徧

游名山焉初採藥於桐廬縣之桓山餌朮涉三年時欲

斷穀以此山近人不得專一四面藩之好道之徒欲相  
見者登樓與語以此爲樂常服氣一氣千餘息永和二  
年移入臨安西山登巖茹芝眇爾自得終焉之志乃  
改名玄字遠游御覽四百十道學論曰許邁清虛接真  
遊又五百三晉中興書曰元山居服食志求仙道又六  
百六十六太平經曰入臨安西山經曰不返人亦不知  
其所與婦書告別御覽六百六十六太平經曰先娶散  
之與婦書告別騎常侍吳郡孫宏女爲妻邁居臨安  
山中爲書謝遣其妻又五百三引晉中興書作乃與婦  
苟令改適又六百六十三真誥曰許遠游第三男名麟  
字道翔小名玉斧糠粃世務居雷平山下修業精勤常  
願早游洞室不欲久停人世遂詣北洞以梁太和六年  
於茅山舊宅年三十而告終又御覽六百六十六引太  
平經云許思元許遠游之弟生而好道儒雅知名晉簡  
文帝爲俗又著詩十二首論神僊之事焉義之造之未  
外之交

嘗不彌日忘歸相與爲世外之交御覽四百十道學論曰與王右軍父子爲

世外之交王亦辭榮好養生之事每造遠遊未嘗不彌日忘返又六百六十九道學傳曰義之亦辭榮養生每

造遠遊彌日忘歸詩書往復多論服餌立遺義之書云自山陰南至臨安

多有金堂玉室仙人芝艸左元放之徒漢末諸得道者

皆在焉御覽五百三引晉中興書作游會稽臨海山誓不歸家洞霄圖志曰後於臨安西山師王世隆

輿地紀勝十二引作自山陰至臨海爲是且與中興書相王氏載此于天台山下似以臨海爲是

合本傳誤作臨安抱朴子曰昔左慈字元放於天柱山中精思積久乃神人授以金丹仙經會漢末大亂不遑

修鍊而避地來渡江東志欲投名山義之自爲之傳述以修斯道從祖仙公又從元放受之

靈異之跡甚多不可詳記立自後莫測所終好道者皆

謂之羽化矣御覽八百七十一許邁別傳曰高平閭慶等皆就暎受集暎曰閭君可服氣以斷穀

彭君宜餌藥以益氣慶等將去映爲燒香以五色煙出  
映亦自去莫知所在又五百三晉中興書曰或以爲昇  
仙太平廣記十四引十二真君傳曰許真君以東晉孝  
武帝太元二年八月一日於洪州西山舉家四十二口  
拔宅上昇而去唯有石函藥曰各一所車轂一具與真  
君所御錦帳復自雲中墮於故宅鄉人因於其地置游  
帷觀焉

制曰書契之興肇乎中古繩文鳥跡不足可觀末代去

朴歸華舒賤點翰爭相誇尙競其工拙伯英臨池之妙

無復餘蹤師宜懸帳之奇

困學紀聞二十日以衛恆四  
體書序攷之懸帳乃梁鵠書

非師宜  
官書也

罕有遺跡逮乎鍾王以降略可言焉鍾雖擅美

一時亦爲迴絕論其盡善或有所疑至於布織濃分疎

密霞舒雲卷無所閒然但其體則古而不今字則長而

逾制語其大量以此爲瑕獻之雖有父風殊非新巧觀其字勢疎瘦如隆冬之枯樹覽其筆蹤拘束若嚴家之餓隸其枯樹也雖槎枿而無屈伸其餓隸也則羈羸而不放縱兼斯二者故翰墨之病歟子雲近出擅名江表然僅得成書無丈夫之氣行行若縈春蚓字字如縮秋蛇卧王蒙於紙中坐徐偃於筆下雖禿千兔之翰聚無一毫之筋窮萬穀之皮斂無半分之骨以茲播美非其濫名邪此數子者皆譽過其實所以詳察古今研精篆素盡善盡美其惟王逸少乎觀其點曳之工裁成之妙煙霏露結狀若斷而還連鳳翥龍蟠勢如斜而反正

元作



直翫之不覺爲倦覽之莫識其端心慕手追此人而已  
其餘區區之類何足論哉

晉書斟注卷八十